

吳興備志

五



吳興志卷之十二

烏程董斯張遐周彙編

人物徵第五之五

倪偁字文舉號綺川居士南渡時居東林登紹興進士任承議郎太常年五十二卒贈少師所著有綺川集十五卷子恕愿思竝登進士第

恕字行甫淮東撫幹愿字添甫知建平恕子祖濠字

子孟亦登進士

東林山志

倪思字正甫試禮部侍郎兼直學士院韓侂胄先以書致殷懃曰國事如此一世人望豈專以潔已爲賢哉思報曰但恐方拙不能徇時好耳逮入見論言路不通自

呂祖儉謫徙而朝士不敢輸忠自呂祖泰編竄而布衣不敢極說又言蘇師旦贓鉅萬當戮皇甫斌李爽秦世輔潰將皆罪大罰輕又士大夫寡廉恥有列拜門要稱門生不足甚至於恩父者侂胄大怒思旣退謂侂胄曰公明有餘而聰不足堂中剖決如流此明有餘爲蘇師旦蒙蔽此聰不足也周筠與師旦竝爲姦利師旦已敗筠尙在人言平章騎虎不下之勢此李林甫楊國忠晚節也侂胄悚然曰聞所未聞司諫毛憲劾思子嗣侂胄殛除權兵部尙書兼侍讀求對言大權方歸所當防微一有干預端倪必且仍蹈覆轍侂胄雖誅而人言猶有未靖者蓋以樞臣猶兼宮賓不時宣召宰執宜同班同

對樞臣亦當遠權以息外議樞臣謂史彌遠也金人求  
侂胄函首命廷臣集議思謂有傷國體既與金講解中  
書議表賀有以和戎爲二府功欲遷秩者思執不可乃  
止尋以忤彌遠求去以寶謨閣直學士知福州彌遠拜  
右丞相陳晦草制用昆命元龜語思歎曰董賢爲大司  
馬冊文有允執厥中一言蕭咸以爲堯禪舜之文長老  
見之莫不心懼今制詞所引此舜禹揖遜也有如蕭咸  
者讀之得不大駭乎乃上省牘請貼改麻制下分析彌  
遠遂除晦殿中侍御史卽劾思藩臣僭論麻制鐫職而  
罷思性剛介不苟合嘗言與其爲有瑕執政寧爲無瑕  
從官故慶元嘉定之間屢召屢出名重天下

宋史參東

淳熙十一年冬十月太常博士倪思言舉人輕視史學今之論史者獨取漢唐混一之事三國六朝五代爲非盛世而恥談之然其進取之得失守禦之當否籌策之疏密區處兵民之方形勢成敗之迹俾加討究有補國家請諭春官凡課試命題雜出諸史無所拘忌考覈之際稍以論策爲重毋止以初場定去留從之

宋通鑑

淳熙十六年七月辛酉儒林郎倪恕等以封事可采

遷官免文解有差

宋史

思子祖仁字子榮通判南劍州祖禮字子簡知金谿祖

智字子大監丹徒縣事祖信字子誠充福建幹辦公事  
祖義字子由思次子知無錫縣編吳興分類詩集三十

卷

東林山志

倪祖常字子武思第六子有學行淳熙中中博學宏詞  
科嘉定壬午四月自毘陵易守徽州先州民困于和糴  
郡計二萬斛強無爲有人所弗堪祖常惻然加念屢贖  
申省事得寢凡除害興利去災致順輦通道之衢廣振  
乏之廩撓嘉賓之館新明刑之字宣布令條而民興行  
誼出入阡陌而農務耕桑教化所關悉意奉行有古循  
良之風治最上聞士民茹德累官朝散大夫華文殿脩

撰兼禮部侍郎

東林山志

沈偕字君與號太清子東老之子登進士歷左宣德郎終知池州宣德縣

東老沈氏之老自謂也湖人因以名之其子偕作詩有可觀者

東坡題東老庵詩敘

沈友直字伯益偕之子以太學上舍中賢良方正孝廉等科政和中賜第授潁昌府教授教導有方執經席下成就才能者甚眾考課爲諸路最于長卿

沈脩字誠中東老曾孫賢而才雖貧有守挺挺得祖風

竝上

沈清臣字正卿烏程人紹興丁丑進士因上書極論諫官不當用歸正人語侵時宰貶封州放還隱居城南號

晦巖勔書屋以來四方學者召入遷至皇子嘉王府翊善旬祠卽所居治圃築亭揭閣目曰潛谿多所賦詠後以祕閣脩撰終于家

西吳里語

沈清臣紹興末知封州政尙簡易一介不取風節凜然人望而畏之謂不媿其名云

廣東志

高宗崩孝宗欲行三年喪敕令所刪定官沈清臣論對喪服六事凡八千言展讀甚久極合上意知閣張嶷奏已展正引例隔下清臣奏讀如初久之嶷又云簡徑奏事上曰令勿卻已而甚久嶷前奏恐妨進膳清臣正色曰言天下事讀竟乃已上勞之曰卿二十年閒廢今不枉矣

癸辛雜識



淳熙十六年二月庚寅詔中書舍人羅點具可爲臺  
諫者點以葉適沈清臣等八人上之

宋史

沈度字公雅德清人紹興閒令餘干政有三善田無廢  
土市無閒居獄犴無宿繫民謳歌之以考功郎中除直  
祕閣知平江府乾道二年七月召赴行在上曰甲申之  
歲委卿守吳門未幾治行昭著果如朕所料可謂得人  
又詢吳中歲事如何具以豐穰對上曰二年以來水澇  
軫憂惟恐懼脩省以百姓爲念耳度奏臣初到郡水歉  
糶食荷陛下捐四萬石馬料以振濟全活甚眾上曰正  
賴良守措置漢宣帝所謂與我共理者其惟良二千石  
乎卽以爲中書門下省檢正諸房公事四年又以直龍

圖閣知建寧府是時朱子在崇安爲屬吏勸立社倉均  
糴備貸度乃以錢六萬緡助其役倉成民賴之朱子爲  
記其事又知臨安府仕終兵部尙書范成大吳郡志王  
鏊姑蘇志及維揚志

衢按驂鸞錄謂過德清往觀公雅考室而揚志謂爲  
播曾孫不知遷在何時錄又謂公雅素傳過庭所教  
常有知止易足之說不知指何人宋史傳銖錫而不  
傳公雅何也

劉坦之字平子吳興人淳熙初知歙縣勤于催科撫字  
之任作知縣廳壁記慶元二年六月以朝請大夫知台  
州三年十二月除河北路提舉常平茶鹽徽州志赤城

周謙孫湖州人右儒林郎知公安縣

陸游入蜀記

嘉定二年正月丁巳章良能自御史中丞除中大夫同知樞密院事六年四月丙子章良能除參知政事

章文莊少好雅潔性滑稽居一室必汎埽巧飾陳列琴書或譏其無遠志一日大書素屏曰陳蕃不事一室而欲埽除天下吾知其無能爲矣識者知不凡後

居兩制登政地

齊東野語

章文莊公以右史直禁林時宇文挺臣紹節爲司諫指公爲謝深甫丞相之黨出知溫陵旣而公入爲言官遍歷三院爲中執法時挺臣以京湖宣無使知江

陵府入覲除端明殿學士挺臣懷前日之疑不敢拜  
文莊識其意乃抗疏言公論出一時之見豈敢以報  
私憾乞趣紹節就職未幾公亦登政地

竝上

章文莊參政與其兄宗卿雖世家五馬而清貧自若  
少依鄉校沈丞相該之家學相連章日過其門沈氏  
少年與客坐于廳事時方嚴冬二章衣掩脛沈哂之  
曰此人會著及時衣客傲之曰二章才學鄉曲所推  
不可忽也章亦微聞之旣而兄弟聯登第駸駸通顯  
沈氏之屋適有出售者宗卿首買之以居焉

癸辛雜

識

嘉定元年起居舍人章良能陳主司三弊一曰沮抑

詞賦太甚既暗削分數又多置下陳二曰假借春秋  
太過諸處解榜多寘首選三曰國朝正史與實錄等  
書人閒私藏具有法禁惟公卿子弟或因父兄得以  
竊窺有力之家冒禁傳寫而有司乃取本朝故事藏  
匿本末發爲策問寒遠之士無由盡知請自今詩賦  
純正者寘之前列春秋卓異者不妨巍占若所作無  
異諸經自當雜定高下其策題竝須明白指問詔從  
之

文獻通攷

良能字達之吳興人卽癸辛雜識中所謂章參政文  
莊公也城南有嘉林園良能宋史不爲立傳兄良肱  
字翼之亦舉進士歷宗卿攷宋史呂午傳有浙東提

舉章良朋者當亦文莊羣從耶良能子叔恭倅襄州見齊東野語良朋爲施宿壻適康侯以寫本癸辛雜識見示多會稽商氏刻本所未載者得此一條快甚  
詳瓌徵

良能吳興人史傳靡可攷無弁陽老人書幾與草木同腐矣著述之不可已如是張按宋史史彌遠初革韓侂胄之政召還正人良能與樓鑰婁機同執政當亦一時佳士史家不爲立傳何也

章良朋字益之慶元三年爲旌德尉嘉定中爲慶元刺史兼權沿海制置司公事時留呂午在幕海波未平問策安在午廉知調軍出海糧盡卽還軍獲寇物官盡拘

收乃與制置司幹官施一飛議糧盡再給不許擅還賊  
舟所有悉以給軍海道遂清紹定元年三月以朝奉大  
夫直寶謨閣知平江府七月致仕

見宋史寧國寧波姑

蘇三志

談鑰與文莊兄弟同于淳熙時登第而文莊又爲周  
密外大父其爲湖人無疑矣栝紀亦列之選舉豈其  
先本栝人自其父駒來湖耶駒紹興十八年進士見  
考亭登科錄爲寧海尉上虞令見臨海紹興兩志良  
肱嘉定間福建轉運司判官見八閩通志江西提刑  
見梅亭四六知臨安府見杭志

元衢

趙時逢遜可爲贛州守贛妓朱雲楚子卿警慧知書趙

嘗會客果實有炮栗趙指之曰栗綻縫黃見坐客屬對  
皆莫能楚輒曰妾有對取席閒藕片以進曰藕斷露絲  
飛趙大奇之

灌園史

贛州志注漢東人當是寄貫

時逢宗室孝光閒知仁和縣

杭州府志

王孝嚴淳熙時處州推官

栝蒼集紀

新塗丞許脩職孝謦湖州人

周平園乾道庚寅奏事錄

蔣南金字汝貴德清人淳熙八年登第嘉定中知容州  
興學校立貢院在任三年日以教養爲事未嘗有逸豫

游樂之好

梧州志

劉直儒字溫叔長興人不慕仕進肥遯山林以詩酒自

娛有文集十卷

長興志



俞澂字子清尚元孫以清介自持所至有治聲爲刑部  
侍郎丐休除寶謨閣待制放意泉石創圃于南門之外  
去城二里許與小浮玉山相對號曰無塵時以扁舟往  
來飲酒賦詩自樂焉

談志

吾鄉前輩俞且軒侍郎善墨戲竹石逮今爲人寶重  
然人知其能畫而不知其爲人因書其槩于此侍郎  
名澂因伯祖閣學字居易恩入仕中刑法科短小精  
悍清淡簡約樂易無涯岸而居官守正不阿其爲福  
建檢法陳丞相帥三山治盜過嚴一日驅數十囚欲  
投諸海澂白其長曰朝廷有憲部而郡國無憲臺可  
乎力爭之因命閱實遂爲區別戮者黥者各若干陳

始怒而後喜其有守悉從之且薦以京秩爲刑部郎  
日有鄉豪素以俠稱爲時所畏殺人誘其奴獄上駭  
之請自鞠豪因得其直光宗壯之卽日除大理少卿  
然竟爲豪擠去又常德有舟梢程亮殺巡檢宋正國  
一家十二口累歲始獲乃在寧廟登極赦前吏受其  
賂欲出之激奏援太祖廟戮范義超故事以爲殺人  
于異代旣更開國大需猶所不赦況亮乎于是遂正  
典刑後權刑部侍郎以待制致仕家居十年乃終年  
七十八且軒其自號也俞氏自退翁起家七十而納  
祿至澂凡五人且皆享高年有園池琴書歌舞之樂  
鄉曲榮之後余得竹石二紙于故家葉如黍米亦奇

潤自成一家上題印居易戲作蓋閣學俟所爲也因  
知子清戲墨有所自來此亦人所未知者因并表而  
出之

齊東野語

沈誥字宜之以大父與求蔭補京秩鎖廳賜出身紹熙  
初光宗嗣位歷官左右司直轉運兩浙本路舊無試闈  
誥于抱城北隅列屋三百楹歲減官錢甚夥奏蠲德清  
稅務錢二萬四千緡初至漕額才十八萬緡去之日至  
六十餘萬進太府卿榜所居堂曰歸來開禧中謁告家  
居已十年矣召起歸班時韓侂胄議大舉誥論中興與  
勦業不同今以所當保之基冀不可必之功宜審所處  
莫若脩備以觀變臺臣謂其動搖國論予祠去更化初

召除刑部侍郎遷戶部尙書

德清縣志

沈詵漳熙閒知臨江軍嘗買民陟以廣貢院又翻刻

二劉春秋傳權衡意林于郡學宮

臨江府志

葛公謙問文康公孫也魁然重厚古君子宦情世故皆

應以無心文采外深契禪悅終倅毘陵葛名鄰

周輝清

波雜誌詳白法志

鄰吳興人

葛郭漳熙閒知興化軍事

八閩通志

郭漳熙七年以朝奉郎通判潤州

鎮江府志

葛邲字楚輔吳興人高祖密至邲五世登科第大父勝  
仲至邲三世掌詞命邲少警敏以蔭爲上元丞登第除  
國子博士輪對論州縣受納及鬻爵之弊又論征權歲

增之害上召令條陳邲以六事對皆切中時弊除侍御  
史論救荒三事累遷給事中除刑部尙書邲爲東宮僚  
屬八年孝宗書安遇二字以賜又出梅花詩命邲屬和  
眷遇甚渥光宗受禪除參知政事又除知樞密院事紹  
熙四年拜左丞相專守祖宗法度薦進人物博采公論  
惟恐其不聞之嘗曰十二時中莫欺自己其實踐如此  
贈少師諡文定

宋史

寶慶二年三月戊寅建昭勳崇德閣趙普曹彬辭居  
正石熙載潘美李沆王旦李繼隆王曾呂夷簡曹瑋  
韓琦曾公亮富弼司馬光韓忠彥呂頤浩趙鼎韓世  
忠張浚陳康伯史浩葛邲後益以趙汝愚凡二十四

人皆圖形其上

通鑑

濮坦歸安人淳熙閒知尤谿縣廉明有吏才至官當縣凋敝之餘每事振刷自立并井可觀士民德之

沈介字德和德清人歷中書舍人以次對知平江召歸上疏甚剴切備言虜必爲患明年虜犯兩淮乃以兵部尙書爲荊湖制置及再知郡上諭以平江輔郡極難其人知卿政事特加遴選當爲朕撫恤百姓均財節用使恩威竝施爲佳如常平錢米以備凶荒訓兵令精不必增補至于兵器亦令堅緻其眷遇如此

沈介紹興二十七年十二月以左朝散郎知台州爲

政有聲雨暘禱輒應

赤城舊志

黃中字通老副沈介使金還累遷權禮部侍郎中之  
初還也言金治汴宮必徙居見迫宜早爲計上矍然  
宰相顧謂中曰沈介歸殊不聞此何耶居數日中白  
宰相請以妄言待罪湯思退怒語侵中已乃除介吏  
部侍郎徙中以補其處

宋史

沈介乾道四年以顯謨閣學士守信郡前此趙師嚴  
在任時州兵嘗欲援往例有所求不獲遂聚謀亂後  
雖散府庫以撫之復反側不安介代至誅首領二人  
餘皆安堵歲飢振貸有方民得不死是歲六月移知  
溧州去之日老稚扶攜行數十里涕泣不能捨

廣信

郡志

王正功爲荆湖轉運主管時尙書沈公介爲帥尤簡  
貴威重裁決無敢輒經外臺者理或未安君改之不  
疑沈公更加敬異不以爲忤也沈公更薦之又爲延

譽 樓鑰王正功墓志

公知紹興十二年貢舉考博學宏詞科得洪遵沈介  
洪适以所試制詞進讀上曰是洪皓子耶父在這能  
自立此忠義報也遂以遵爲祕書省正字介适竝爲  
敕令所刪定官自中興以來詞科登選卽入館自是  
科始 程克俊家傳

吳興沈文炳堯夫有聲國學養親不仕嘗作論語解周  
必大序之 平園續稿



沈祖德字德遠歸安人乾道八年自樞密院檢詳守常  
州遷太府少卿總領淮東軍馬錢糧

蕭德藻重脩周將

軍廟記

祖德以承議郎知衢州後除直敷文閣

見衢志

李元吉湖州人淳祐閒知福清頗以師儒自任爲人仁  
明峭直不可干以私始視事每日二百餘狀未期月惟  
三狀時劍建盜起他處隅官練兵盡激其變獨福清晏  
然監司亦不之責嘗曰吾爲政惟容吏輩一二人故一  
時雁鷺棄逐殆盡易簣之際惟以閹兩恤刑爲念對妻  
子無私語

八閩通志

章謙亨字牧叔吳興人紹定閒知鉛山爲政寬平人號

爲佛家置像而祠焉其興學養士禦盜安民禮賢表俗  
蠲賦救荒之績邑人勒之章巖識不忘云

鉛書

謙亨于嘉定十七年知泰興縣見維揚志嘉熙三年  
朝請大夫直祕閣浙東提刑兼知衢州見衢志

章燮嘉泰四年浙東提刑開禧二年知紹興府劉宰任  
浙東判官時有謝章倉燮舉改官啟

劉漫塘集

楊萬里爲監司舉部內所知云文林郎監淮西總領所  
西酒庫章燮操行甚脩問學甚正早魁里選高擢省闈  
其於文詞尤工牋奏不越駢四儷六之體而行以古雅  
議論之文有前輩風至于吏能尤復精敏無爲軍與和  
州嘗爭一鎮稅場務兩郡太守移書請乞卻而不視卒

昇所應得之郡建康嘗有人家奪細民田漕臣林析委  
以裁決竟還細民前淮西總領張抑嘗以賢薦之於陛  
下登極之初此亦館學之奇才也

誠齋集

朝廷與金人約和金人約函致韓侂胄首詔令臺諫  
侍從兩省雜議黃疇若與章燮等奏乞梟首然後函

送敵國人譏其有失國體

宋史

施邁紹熙中以朝散郎知江陰軍時賦繁用竭民積逋  
官錢若干萬緡疏于朝乞蠲之尤篤意文獻命教授鄭  
應中續脩郡志僉書軍判官廳公事俞巨源序之

常州

府志 施俞俱吳興人

雒山周宗聖師成書之長興人少年秀麗讀書善記議

論古今落落可聽有詩高遠愛作選格有梅詩曰采采  
芳梅枝瑣碎白雲姿在山千花怨出山百鳥嘯操持思  
所寄轉趾述所思清披太始風寒應太虛月一日拂人  
衣三歲香不歇仕不得志晚年若有所遇如游仙散聖  
之徒

貴耳二集

朱南強字柔立初主晉陵簿有倚當塗親奪民田者南  
強按歸之淮浙蝗悉力捕瘞移宰上虞地三鄉瀕海民  
業煮鹽多致訟乃析利害上提舉請置交易民甚便之  
安吉志

朱應元字見則歷監察御史崇政殿說書首劾時宰去  
之後爲丁大全所忌被論左遷尋復除監察御史陞右

文殿侍講會星變賈似道當國眾畏縮莫敢言應元極  
陳時政以起居舍人斥歸

朱應祥登紹興元年第清名勁節重于一時出知邵武  
軍治狀焯焯可紀官至朝請大夫

朱吉甫字邦憲幼警敏善屬文貢舉擢本經第一初除  
徽州司戶有能聲調建康府左司理參軍平反冤獄民  
甚德之後監行在文思授通直郎

朱龍文字鼎臣刻意問學以易魁鄉舉登第主高郵興  
化簿會寶應有久訟葑田者接治片言而決咸漳閒爲  
揚州簽廳賈似道專政士欲速化者奔走其門龍文終  
身不以姓名通其自守如此

嚴抗字汝抑紹興十五年劉章榜進士歷官至諫議大夫擊豪倖有賢良進卷二帙

周頡字元吉歷左右司郎中直龍圖閣福建轉運使有適菴集百卷與楊萬里程大昌洪邁諸賢倡醇詩二卷  
並上

紹興四年鄭丙以正奉大夫致仕時史丞相浩沈詹事樞右司郎中周頡與丙皆同年進士退休于二浙詩筒唱酬人競傳之

周必大鄭丙神道碑

周祐字子受自長城徙居武康以春秋登進士第沈靜寡交不事表暴恬熙若布素無仕進心丞相留正葛邲以文行薦于朝除諸王宮教授以疾力辭累敦促赴闕

卒不就 兩浙名賢錄

朱煥文字實甫弱冠有聲胄監時馬碧梧爲相擇婿于六館得煥文曰可妻也以其女歸之初署迪功郎後以湖州教授致仕屬文敏麗尤善詩有北山稿若干卷 安吉志

朱天錫歸安人父喪哭泣廬墓三年有司聞于朝旌之 歸安志

施碩知應天府

朱武都官員外郎

周之道字覺民刑部侍郎

周景賢知萊州子敦孫愆著三周文集

陸元光字明遠知憲州兼河北運司

陳杞字材仲宗正丞

鄭奕字叔明淮西提舉

袁應中字志行國子司業有易講義行于世

施真卿知漢州

周知深字得原兩京業

章傑字秀萬金部郎

章億字樗年大府丞江西提舉

施興祖字德紹知連州

嚴抑知德隅工部侍郎

錢建字立道將作監丞浙西提舉



陳則字子大朝議大夫

袁綜字元理監察御史

孟處字去非淮東運使

周石字介卿直祕閣江東運副

周冲字集虛知興國軍

劉唐稽知常州

陳艾字德俊知瓊州移知邵武府

周極字處中知楚州移知安豐州紹興庚辰極宰華亭  
重脩學宮簽書奉國軍節度判官廳公事許克昌爲之

記

章箴字輿卿分司糧料院

周華字少伊將作監簿

劉三傑字漢臣累入臺諫後陞吏部侍郎華文閣直學士知寧國府

孟致康字仲安知饒州淳熙七年以宣教郎任丹徒令周時中字深微知興化軍

劉攽字仲輔知池州擢樞密副都承旨

劉槐字廷老大理評事

張革字信之湖北運判

劉湛之字明甫軍器監丞廣西提刑

魏大有字仲通直寶文閣江西提刑知贛州

錢几字君憑號圃翁游心儒術學有原委爲一鄉士夫

冠冕徵辟不起凡邑士之登科者第其榜籍爲圖以獎厲後學尤長于詩有云上簪谿頭老圃家一瓢沈醉是生涯之句著詩集三卷

陳晦字自明中童子科繼中博學宏詞科仕至刑部侍郎兼中書舍人有文集三十卷

陳璧字君玉一字起度官至大理寺丞知泰州撰本縣廟學瑞芝記見存刻石著詩文一百卷

自施碩至此俱臧衍長興志

朱震字震之號坦齋幼穎異從父官青陽晦菴先生一見奇之比長受業于袁潔齋之門義理精洽一日友人與論持敬震曰只須言存誠論顏子未達一閒曰體以

心其閒自見歲晚笑傲林泉鐙夕里人招之弗往謝以詩曰賴有半窗知己月已多一點讀書鐙聞者傳誦有益泉集二十卷

安吉志

顧岳寶祐五年以朝請郎除左曹軍器監權發遣戶部判官公事兼知杭州府

安吉志

周蒙字明發吳興人乾道二年以右從事郎知黃巖縣事時郡督賦甚急謀于徐庭筠徐曰與其得罪于百姓孰若得罪于上官遂書一絕于公牒而歸

黃巖縣志

趙善養字浩然居武康十九歲登進士再中法科官至朝奉大夫子汝成汝忱俱登第

勞志

趙浩然宋宗室德昭之後博學能詩爲人倜儻一時

豪傑多與之游舉授春坊授經郎嘗與大都文衡出  
判吉州有善政

長興志

趙彥博字富文居武康之上陌太宗八世孫登進士第  
守郡持節俱以能稱遷工部侍郎子贊夫孫時逢俱登

第

勞志

閔康侯云南渡以來太宗後尙有人也思陵舍本宗  
而登秀邸何耶或曰天命有在

葉懋字天經烏程人少嗜學多識談論亶亶不窮善爲  
文尤長于詩謔少師陳簡齋與義高僧大圓洪智皆擅  
詩名嘗唱酌芙蓉浦上後名其處曰三友亭與義嘗移  
書于懋忽憶扁舟尋二子蓋指懋與洪智也初與義勸

之仕懋不答反與義參知政事動而見格于執政氣抑  
抑不得伸乃歎曰吾今始知天經之高也當時以詩鳴  
于里者有張愛松張可菴丁鶴林張石谷莫岫雲張竹  
曜云

烏青志

監錢清鹽場吳迪功守湖州人

周平園泛舟游山錄

趙伉夫字尊道雪川人開禧乙丑知上高縣內腴而外  
瘠政尙慈恕不忍橫斂民懷愛之目爲趙佛子踰年政  
成事理入爲樞密院承旨官至浙東提刑

江西通志上

高志

知潮州軍州事沈植湖州人開禧閒任

廣東通志

朱俯字伯昂雪川人宰相勝非曾孫也嘉定十四年以

從政郎任鮑郎司鹽十七年滿鎮人黃寅贈俯還朝序  
云不卑小官毅然發軔以廉勤爲本以公恕爲守亭民  
境壤與齊民接挺私怙強舊染成俗君其爬搔事功以  
興君其導齊人心以格人皆目所以幸吾邦者不淺今  
還朝其以能條畫事悉力而開陳之儒術且行于天下  
矣

海鹽縣圖經

趙仲湖州人嘉定閒知楚州脩築城池節制屯營軍馬  
州人便之

淮安府志

陳振孫字伯玉安吉人藏書數千卷各爲解題讐勘精  
覈鄱陽馬端臨多采其語成書提舉浙西舉行萬戶停  
廢醋庫邦人德之管攝興化篆折獄平允時皆服其得

法之意焉

姑蘇志參癸辛雜識文獻通攷

朱泰湖州人家貧鬻薪養母嘗適數十里外易甘旨一日雞初鳴入山及明憩于山足遇虎搏攫負之而去泰已暝眩行百餘步忽稍醒厲聲曰虎爲暴食我所恨母無託爾虎忽棄泰于地走不顧如人疾驅狀泰匍匐而歸母扶持以泣泰竟無恙里人目爲朱虎殘

宋史新編

王圭字君玉范成大外孫也父邁字德遠安吉人依妻家以居登進士終通判太平州圭于父卒忍貧力學孝于其母嘉定十年登第主松陽簿以才幹就升爲令行經界井井有條至今版繪其式制行于天下爲經界者準則後知常州入爲司封郎終朝散大夫自號靜觀有



文集十卷其居官廉家無餘貲死無以斂子敏學彊學俱以圭蔭歷任亦以廉謹聞

姑蘇志

葉箕雪川人紹興二年五月二十二日以朝散大夫知台州三年七月二十日得祠

按衢志箕以奉直大夫知衢州後除江西提刑石林之孫意知延平名筠者亦其裔也

元衢

葉籤箕之從弟慶元三年十二月七日以朝奉郎知台州英敏無留事能治財賦創酒樓五年十月除直祕閣再任六年九月二十一日除本路提舉茶鹽

籤慶元閒知岷縣累石隄捍城見岷志嘉泰閒爲淮南提刑見盱眙志

葉箋雪川人篋之從弟籥之從兄開禧元年六月二十八日以朝奉大夫知台州二年十月二十三日召葉筠嘉泰閒知延平州事性慈惠州俗貧家生子多不舉筠請立舉子倉振給之爲政大率以愛民爲本

按紹聖中郡人有葉筠者登第勞志云清臣之孫此理宗時又有一葉筠也

吳興葉公守延平之二年政孚于民聲聞于天詔以使者節按刑于夔命至日邦人磬磬若飢失哺若寒去裘騷然謠曰若公之來政實多秕胥徒狺狺噬我赤子公遄其驅拯民于塗孰瘡且痍公手摩拊曾是呻吟化爲歌舞公胡不留長我父母旣而聞公之去

也扶老攜幼遮道請留者以什百數

真西山集

姚康朝字廷賓吳興人淳熙二年以朝奉大夫知興化軍事爲政平易不寬不猛年登盜息閭里晏然郡初無貢院康朝爲相地于軍治之西屬通判趙善仁督而成之

興化志

章冲雪川人淳熙十四年正月二十六日以奉直大夫知台州十六年二月一日替其代者沈作賓也

赤城舊志

盧憲雪川人嘉定十二年閏三月以承議郎知台州

程覃字會元文簡公季子提舉兩浙常平茶鹽權沿海每置司事嘉定六年莅任以東錢湖它山堰灌溉甚博

每患湮圯始置田租以所收歲給浚導者撥錢及田造器服以勸學蠲海錯果賦之征以惠民凡公府廨舍城郭戎器倉場橋道以至鄉飲器具織悉畢備人服其整十年知臨安府紹定四年知紹興府終司農卿集英殿脩撰兄準知慶元府阜通判廬州

徽杭寧紹四志白獺

髓

沈璞吳興人紹定元年以宣議郎知嘉定縣

本縣志

魯伯能幼嗜學家貧無燈燭每乘月光誦讀達旦八歲作同道賦見者奇之九歲通五經有文集三百餘卷官

至虔州太守

安吉志

劉筥吳興人宋上虞知縣有志興葺建宣聖殿闢射圃

化民成俗

本縣志

陳日強吳興人知臨江軍首鋤豪霸劾貪殘訟簡刑清  
一郡肅然

臨江府志

周燦雪川人嘉定丙子福州郡丞攝府事

鼓山題名

周備字正輔安吉人寶祐四年知新昌縣事剛正明敏  
不畏強禦時丁大全引用汚吏預令州縣上供備舉手  
誓天曰備頭可斷決不爲新昌開此例上命督責愈急  
備持之愈確當時咸以頑令目之其後他州縣被害積  
五六年不已而新昌以備故獨免云秩滿攝監察御史  
忌者諷臺臣劾去公論惜之

紹興府志

朱鏜湖州人慶元末豐城知縣

周鑰湖州人端平元年奉議郎任豐城知縣

李仁芳湖州人嘉定十一年分寧知縣脩山谷瑩祠

昌府志

芮立言嘉泰初知邵武軍事爲治清廉明決

八閩志

芮及言字子及嘉泰三年知上高縣政事精勤容貌嚴厲一縣憚之號爲小監司嘗書所坐屏後少飲酒加餐飯勤出廨公事辦莅官四年終始如一

竝上

朱大同湖州人慶元四年以迪功郎任仙游縣尉

仙游

縣志

時鞏字子固雪川人紹熙四年黃巖令

本縣志

劉鼎孫字遂初雪人嘉泰二年黃巖令

本縣志

壺徵字慎之雲巖令德之六世孫也嘉定閒爲舒州通判致仕歸濟王竑愛幸之王爲史彌遠所害徵同死焉見西山廣記曾捨粟五百石以濟鎮人

烏青志

劉安世安吉天目鄉人宋迪功郎常德石首縣簿因家焉

林右跋金氏族譜

吳淵字道夫嘉定中第進士差浙東制置使司幹辦公事丁父憂詔以前職起復力辭弗許再辭且貽書政府曰冒哀求榮平生大節掃地矣他日何以事君時史嵩之方起復或曰得無碍時宰乎淵弗顧詔從之歷江西安撫使會歲大祲講行荒政全活者百萬人復知鎮江平江兼浙西兩漕發運使歲亦大祲因淵全活者又百

餘萬人進沿江制置使三郡屯田使朝廷付淵以光豐  
蘄黃之事凡勅司空山燕家山金剛臺等大砦三小砦  
二十有一團丁壯立隊伍無事則耕有警則禦詔以淵  
興利除害封金陵公累官參知政事卒贈少師謚莊敏  
淵有才略迄濟事功所至興學養士然政尙嚴酷好興  
羅織之獄籍入豪橫故時有蜈蚣之謠其弟潛亦數諫  
止之所著易解及退庵文集奏議

徽州府志

吳潛字毅夫淵弟也舉進士第一歷左丞相許國公元  
兵渡江攻鄂州別將由大理下交趾破廣西湖南諸郡  
潛奏今鄂渚被兵湖南擾動推原禍根良由近年姦臣  
儉士設爲虛議迷國誤軍其禍一二年而愈酷附和逢



迎媿阿諂媚積至于大不靖臣年將七十捐軀致命所不敢辭所深痛者臣交任之日上流之兵已踰黃漢廣右之兵已蹈賓柳謂臣壞天下之事亦可哀已又論國家安危治亂之原蓋自近年公道晦蝕私意橫流仁賢空虛名節喪敗忠嘉絕響諛佞成風天怒而陛下不知人怨而陛下不察稔成兵戈之禍積爲宗社之憂乞令大全致仕沈炎等與祠不報屬將立度宗爲太子潛密奏云臣無彌遠之材忠王無陛下之福帝怒竟以炎論劾落職尋責授化州團練使循州安置潛預知死日語人曰吾將逝矣夜必大雷風已而果然至四鼓開霽撰遺表作詩頌端坐而逝景定三年五月也德祐初贈少

師宋史

吳淵吳潛皆生長德清非流寓也潛死時焚青詞以告天爲詩曰夫子曳杖逍遙曾子易簣競戰聖賢樂天知天吳子中庸一線又曰生在湖州新市鎮死在循州貢院中一場雜劇也好笑來時無物去時空

德清新志

履齋吳相循州安置以賈似道私憾之故未幾除承節郎劉宗申知循州劉江湖士專以口舌嚇迫當路要人貨賄官爵士大夫畏其口姑厚餽彌縫其得官亦由此守循之際似道欲其殺吳相宗申至郡所以拮據履齋者無所不至

山房隨筆

西湖志載胡長孺爲廣福廟神作傳云劉宗申者暴戾士也以縱橫游說江淮閒客李曾伯所怨曾伯子杓誣以陰事曾伯納官以贖猶除杓名劉借七寶寺館焉買妾置券盛陳金銀器飲食妾父若牙僧夸示多藏奴辭榮刺知藏處夜懷刃入劉臥中殺劉擇取藏物逃去張按劉一鶚冠耳不憚犯天下惡聲殺人媚人捷邀富貴豈知木綿庵尙無恙而辭榮者先代吳丞相復仇哉好還之巧若此

吳璞字禹珉號覺軒許國公長子登淳祐四年進士第授校書郎除嘉興府通判添沿江鎮撫使信賞必罰將士用命大敗元人兵于泗州及知鎮江治城導隍嚴于

守備邊寇永息寶祐六年除吏部尚書掌左選與丁大全不協歎曰吾不能爲梁成大呂惠卿遂抗章丐聞文天祥稱其有揚休山立之韻日光玉潔之襟

德清新志

屠瓚字元卿好讀書潔行舉明經當理度時國事日舛于是託空門終身不仕別號有髮僧云

浙直分署紀事

本末

劉唐裒吳興人乾道中松陽令

栢蒼彙紀

沈平字東皋烏程人雅好文鄭清之吳潛與之游薦于朝欲官之皆以疾辭不赴人稱爲沈處士云當時里中碑刻多出其手所著東皋遺稿若干卷烏青記四卷行

于世

烏青志

趙與嘗字仲父秀安王四世孫以父蔭調饒州司戶參  
軍歷戶部侍郎侍郎劉震孫曰與嘗于時爲循吏于朝  
爲名臣于國爲信厚公族世以爲知言子孟頔孟頔孟  
頔孟頔孟頔孟頔孟頔皆顯貴

歸安志

常懋字長孺武康人歷兩浙轉運使脩築海鹽海晏塘  
旣而以集英殿脩撰知平江府值旱故事郡守合得緡  
錢十五萬懋悉以爲民食軍餉助捐苗九萬稅十三萬  
版帳十六萬又蠲新苗二萬八千大寬公稅之力飛蝗  
幾入境疾風飄入太湖節浮費脩守庫旣代有送還事  
例自給吏卒外餘金萬楮悉不受吏驚曰人言常侍郎  
不受錢果然改浙東安撫使

姑蘇志

常楙浙東安撫使值水災捐萬楮以振之又以諸暨  
被水尤甚給二萬楮付縣折運民食不至乏絕民各  
祀于家會稽山陰死者暴露與貧無以爲殮者造棺  
以給之召爲刑部侍郎平反僞獄全活甚眾

浙江通

志

景定甲子歲度宗踐祚之初監察御史常楙奏巴陵  
之事豈其本心眞宗能還秦邸之後以成太宗之心  
陛下豈不能爲故王續一綫之脈哉旣而御筆云濟  
王生前之官先已與追復尙有未復所贈官嘗曰留  
以遺後人卽仁皇踐祚贈秦王太師尙書之典也所  
宜繼志以慰泉壤可追復太師保靜鎮潼軍節度使

宋時丁氏世家吳興之安吉名暉者慶元丙辰進士官  
中大夫太府少卿總領淮東軍馬錢糧生嘉定癸未進  
士朝奉郎淮東制置大使司幹辦公事伯虎伯虎生儒  
林郎浙西提舉常平茶鹽司幹辦公事應復應復爲昭  
慶軍節度掌書記王罔金壻王之婦則贈朝散郎義烏  
黃伯信女也伯信子朝請大夫夢炎孫承節郎堯堯以  
疾廢夢炎以應復第四子後之製名曰鑄沿恩補將仕  
郎宋亡丁氏家落鑄迎應復及其兄將仕郎仁以歸侍  
養終身歲時爲位以祭惟謹後鑄子文獻公潛貴贈堯  
嘉議大夫禮部尙書輕車都尉追封江夏郡侯封鑄從

仕郎温州路樂清縣尹累贈中奉大夫江浙等處行中  
書省參知政事追封江夏郡公

黃潛先考墓志銘後記

參柳貫危素宋濂二狀一碑

衢按二丁登第不見湖志而見杭志豈文獻妄書先  
世土著而諸集參互不足據哉宋時無寄貫之禁如  
朱繹之端常父子本雲間人而用湖州貫莫汲葛邵  
萬介本湖人而用開封處州貫可類推矣夫姚元之  
爲唐相系自武康潛爲元學系自安吉雖世有遠近  
而功業文章不相上下且俱謚文獻爲余與遐周得  
之眞一奇也若潛本氏丁迨貴而不請復僅拳拳于  
墓中之石尤徵其厚云



牟巖字獻甫子才子也巖善屬文一門父子自爲師友  
討論經學以義理相切摩於諸經皆有成說惟五經音  
攷盛行于世

巖大理少卿按戴表元牟氏壽席詩序先生還會稽  
使者節則巖當晚宋嘗守越矣

沈仲固吳興老儒也嘗云道學之名起于元祐盛于淳  
熙後有假其名以欺世者真可以噓枯吹生凡治財賦  
者則目爲聚斂開闢捍邊者則目爲麤材讀書作文者  
則目爲玩物喪志留心政事則目爲俗吏其所讀者止  
四書近思錄通書太極圖東西銘語類之類自詭其學  
自正心脩身齊家至治國平天下故爲之說曰爲生民

立極爲天地立心爲萬世開太平爲前聖繼絕學其爲  
太守監司必須建立書院立諸賢之祠或刊注四書衍  
輯語錄然後號爲賢者則可以鈞致聲名場屋之文必  
須引用以爲文則可以擢巍科爲名士不則立身如溫  
國文章氣節如坡仙亦非本色也於是天下競趨之稍  
有議及其黨必擠之爲小人雖時君亦不得而辨之矣  
其氣燄可畏如此然夷攷其所行則言行了不相顧皆  
不近人情之事異時必將爲國家禍恐不在典午清談  
之下也沈蓋日擊宋事故言及此其後賈師憲當國獨  
握大柄惟恐有僨其勢者故專求此一等人列之要路  
名爲尊崇道學其實幸其不才憤憤不致掣其肘耳以

至萬事不理喪身亡國仲固之言不幸而中嗚呼尙忍

言之哉

齊東野語

沈次卿吳興人待制之後常登趙節齋之門趙京尹使督十三酒庫人無怨咨嘗言比校自有捷法既不害物自行激勸其法使拘戶于本府人錢給由詣諸庫打酒仍使自擇所向遇比校則萃諸庫而視其所售之多寡取其殿最之尤者加之賞罰誠令不煩激厲自倍真不

易之良法

並上

壺弢字怡樂號萬菊居士烏程人同安主簿嘉會之五世孫也幼以孝弟稱及長恥事胡元隱不出工詩詞有樵雲集集中自稱宋謙之或曰無名氏曰宋者不忘本

也曰無名氏者恥成名也其詞曰壺山居士未老心先  
懶壺山寓姓未老心先懶寓不任意也又曰身在玉壺  
邊曰梅瘦玉壺中皆此意也龍泉章三益之師他門人  
之顯者以百計有怡樂墓誌樵李襄毅公項忠乃渠孫  
守正之徒事見襄毅詞林中

烏青志

顏旒字景義烏程人舉泰定四年進士官至江西行省  
員外郎有能聲拙簪後日與文人墨士唱和林泉以終  
壽考晚年號竹雲怡老有歸閒集

並上

牟應龍字伯成蠟子也應龍幼警敏過人日記數千言  
文章有渾厚之氣應龍當以世賞補京官盡讓諸從弟  
擢咸淳進士第時賈似道當國自擬伊周謂馬廷鸞曰

君故與清忠游其孫幸見之當處以高第應龍拒之不  
見及對策具言上下內外之情不通國勢危急之狀考  
官不敢寘上第調光州定城尉應龍曰昔吾祖對策以  
直言忤史彌遠得洪雅尉今固當爾無媿也沿海置制  
司辟爲屬以疾辭不仕而宋亡矣故相留夢炎事世祖  
爲吏部尙書以書招之曰苟至翰林可得也應龍不答  
元史

清忠公以國學博士言事忤時宰鄭清之去國抵吳  
興寓第而先生生清忠公喜字先生曰翁歸先生子  
必遠必大必達必勝必昌

虞集牟公墓志

吳惟信字仲孚號菊潭湖州人寓居嘉定白鶴邨以詩

鳴宋季吳老儒糜先生舜舜諸父也記問該洽九經注疏悉能成誦然垂老不預貢籍見惟信詩亟稱之一日遇諸塗叩以近作惟信誦一絕云白髮傷春又一年閒將心事卜金錢梨花瘦盡東風嬾商略平生到杜鵑糜不覺下拜曰子真謫仙人也老夫每欲效顰則漢高祖唐太宗追逐不少置矣

齊東野語

寶祐間李知孝爲言官與曾極有隙摘極詠春詩爲謗訕押歸聽讀江湖以詩爲諱者數年其後史衛王之子宅之壻趙汝祺喜談詩引至黃中吳仲孚諸人于是詩道復興矣

齊東野語

俞善道退翁之後從吳興徙華亭恥仕元不令子孫進

取四世孫顯始教子允應制成進士墓在佘山李至剛  
銘少師姚廣孝題詩曰聚土成丘馬鬣封墓前木拱氣  
蔥籠九原不作應無憾歲有佳兒爲掃松

松江新志

趙孟頫入見世祖神采煥發世祖顧之喜使坐時方立  
尙書省命孟頫草詔頒天下帝覽之喜曰得朕心之所  
欲言矣他日行東御牆外道險孟頫馬墜河桑哥聞  
之言于帝移築御牆稍西二丈許孟頫自念久在上側  
必爲人忌力請補外出同知濟南路總管府事會脩世  
祖實錄召還京師以翰林侍讀學士撰定祀南郊祝文  
又有旨書金字藏經初孟頫以程鉅夫薦起家爲郎及  
鉅夫爲翰林承旨致仕去孟頫代之先拜其門而後入

院人以爲衣冠盛事至元二年追封魏國公諡文敏所  
著有尙書注琴原樂原得律呂不傳之妙詩文清邃奇  
逸篆籀分隸眞行草書冠絕今古天竺有僧數萬里來  
求其書歸國中寶之其畫山水木石花竹人馬尤精緻  
元史

趙承旨初至京會詔集百官于刑部議法眾欲計至  
元鈔二百貫贓滿者死承旨抗言其非或以承旨年  
少初自南方來議國法不便意頗不平責承旨曰今  
朝廷行至元鈔故犯法者以是計贓論罪汝以爲非  
豈欲阻格至元鈔耶承旨曰法者人命所係議有輕  
重則人不得其死孟頫奉詔與議不敢不言今中統



鈔虛故改至元鈔終無虛時豈有是理公不揆于理  
欲以勢相陵可乎其人何魏色

何氏語林

桑哥者西僧瞻巴國師弟子黠而橫言興利口津津  
涎流元主深喜之與楊眞伽請毀宋故郊廟以爲寺  
與總管府判官宋絜矩請徙宋宗室居江南者實京  
師天下騷然當是時天下大權盡歸于桑哥相安童  
不能禁御時理算天下錢穀已徵者數百萬未徵者  
尙數千萬民不聊生逃山林發兵捕之以稱亂會星  
變集賢學士趙孟頫因阿魯渾薩里入奏請蠲除庶  
天變可弭從之詔草已畢桑哥怒曰此必非帝意孟  
頫曰凡錢穀可得徵者業盡徵之矣其未徵者必貧

窮無賴及是時除之他日言者倘以失陷歸尙書獨不爲丞相累耶桑哥乃默然聽之民以少蘇會元主宴居孟頫侍問葉李留夢炎優劣孟頫對曰夢炎臣父執其人厚重篤自信好謀能斷有大臣器葉李所讀之書臣皆讀之其所知所能臣皆知之能之帝曰汝以夢炎賢于李耶夢炎宋狀元丞相當賈似道誤國罔上依阿取容李布衣乃伏闕上其罪此賢于夢炎遠矣孟頫退謂奉御徹理曰適上論賈似道誤國責夢炎不言今桑哥罪甚于似道而我等不言他日何以辭其責然我遠臣言必不聽上所親信無踰公公必勉之仁者之事也徹理奮曰信知言必死不死

不足以報國會元主畋郭北徹里乘閒具言之元主  
怒謂毀詆大臣命衛士批其頰口鼻血湧出委地上  
少蘇復呼問辨愈力曰臣與桑哥故無仇所以力數  
其罪不顧身者爲國家耳苟畏上怒而不言則禍亂  
何極旣而大臣有助其言者上大怒遂誅桑哥後徹  
里論及斯事歎曰使我有萬世名者子昂之力也

史參歐陽炎神道碑

元世祖歲事南郊他學士撰祝冊有云章亥復生不  
足以步有元之幅員又云謹以太祖聖武皇帝正東  
南之位公曰天子父事天子誇疆理于其父不可且  
公不爲禮乎禮太祖東向居中子孫在左者南向故

稱昭在右者北向故稱穆若南郊之位上帝南面太祖自宜西向故事第稱配天作主公不用何也其人謝服從所刊定皇太后命學士擬改隆福宮名同列擬光被公擬光天或曰光天出陳後主詩不祥公曰帝光天之下出虞書何謂不祥各書所擬進後竟用光天

歐陽玄趙文敏神道碑

仁廟字公而不名語近臣曰文人世所難得唐李太白宋蘇子瞻姓名至今在人耳目朕有趙子昂與古人何別時有撰述輒傳旨屬筆閒與侍臣論公他臣不能及者數事苗裔一也姿表二也博學多聞三也操履醇正四也文詞古雅五也書畫絕倫六也旁通

釋老書詣其玄微七也他日賜鈔五百錠恐中書留  
難以普慶寺別貯賜之慮其畏寒敕內府賜銀鼠翻  
披英廟命公書孝經亦遣使以上尊酒衣二稱卽家  
賜公

並上

楊載狀公云公之才名頗爲書畫所掩人知其書畫  
而不知其文章知其文章而不知其經濟之學也

松

雪齋集

子昂素鄙塵事家務一委之夫人毫髮不以干慮專

意詩書

載行狀

趙孟頫字景魯吳興人以簽書高郵軍判官廳公事未  
任宋歸于元宦情素簿浮沈里閭不求仕進日以翰墨

爲娛書九經一過細字謹楷人傳以爲玩喜與名僧游  
書蓮花華嚴楞嚴圓覺金剛諸經皆數過明窗淨几焚  
香淪茗四時花草婆娑愛賞欣然自得

松雪齋集

趙雍字仲穆孟頫之子善書畫名重當世廕授海州知  
州在官期年後除集賢待制湖州路總管

淮安志

雍二子鳳麟鳳字允文麟字彥徽

趙仲穆善書畫嘗任淮南知州有一玉帶時廉訪某  
官欲得之不從竟以事讎之而罷其職至正中被召  
入朝旨下淮安取往來案牘焚之仕至翰林待制晚

年典郡

農田餘話

趙奕字仲光號西齋晚居吳中與崑山顧仲瑛交仲瑛

稱其爲人有王孫風度而無紈綺故習文敏三子長亮

次仲穆仲光其季也

並上

唐祿字子華歸安人從名儒善解悟章句兼習繪畫舉筆有法趙文敏公一見奇之出入門下嘗以詩通郡守馬煦煦與語合未幾煦擢秋官挾之至都進薦仁宗詔繪嘉禧殿御屏稱旨待詔集賢院遷嘉興路照磨至正五年除休寧縣尹時承平久爲政者習于貪鄙廢事且賦稅不均詭名應戶雜其閒祿一覈而正之及重新縣學等事見范匯虞集于文傳黃潛四記世號唐休寧進奉議大夫吳江州知州致仕後起福建行省僉事而已卒矣年六十九著休寧稿虞爲敘味外味稿黃爲敘皆

傳于世

勞志休寧志張來儀墓碣

王方叔字壯猷與子昂善其先自盱眙徙吳興故推其所自題其詩編云第一山人文集

松雪齋集

王子中武康人居喪廬墓詔表其門閭

元史

子中字居正元人少好學有詩名無仕進意柯敬仲虞邵菴皆相善多唱酬有掛蓑吟三卷行于世

吳興當元初時有八俊之號蓋以子昂爲稱首而錢選舜舉與焉至元閒子昂被薦入朝諸公皆相附取宦達獨舜舉齟齬不合流連詩畫以終其身

靜居集

選號玉潭

張復亨字剛父烏程人力學博聞仕至泰州同知時與



趙子昂牟應龍蕭子中陳無逸陳仲信姚式錢選皆能  
詩號吳興八俊虞邵菴嘗稱唐人之後惟吳興八俊可  
繼其音

勞志

姚式字子敬歸安人學于敖繼翁浙西平章高彥敬薦  
式與鄧文原陳康祖倪淵皆爲儒官

勞志

趙子昂嘗謂人曰姚子敬天資高爽相見令人怒不  
見令人思又贈詩云吾愛子姚子風流如晉人白眼  
視四海清言無一塵其爲子昂敬畏如此金華吳師  
道亦云吳興姚子敬先生人品高勝故其詞章翰墨  
自有天趣

研北雜志參吳禮部集

歙山者西去吳興十有餘里已入勢家莫可物色曹

元者始售而有之以予姚式子敬蓋子敬欲規一區之地以居久矣而不敢望如敷山之美也曹君曰敷山之美我幸有之子貧而賢我以成之

戴帥初敷山

記

遐周曰令今世有子敬子敬有一椽可居其不析而入豪家鮮矣矧予之山哉余不難子敬而難曹君

陳康祖字無逸嗜詩剡源戴表元評其詩爲冰蠶火布煤脫垢盡翛然而潔云

剡源集

子友鄧善之張仲實陳無逸皆英爽之士其言語文字足以雄一時

松雪齋集

陳繹曾字伯敷康祖子爲人雖口吃而精敏異常諸經

注疏多能成誦文詞汪洋浩博其氣燁如也與脩遼史  
官至國子助教論者謂與陳旅相伯仲云 元史參研北  
雜志歐陽圭齋戴剡源兩集

周密宋季爲國局嘗祠蜡充奉禮郎兼太祝終義烏令  
癸辛雜識參圖繪寶鑑周密詳掌故

宇文公諒字子貞其先成都人父挺祖徙吳興歷同知  
餘姚州事夏不雨公諒出禱輒應歲以有年民頌之以  
爲別駕兩攝會稽縣申明冤滯所活者眾省檄察實松  
江海塗田公諒以潮汐不常後必貽患請一槩免科省  
臣從之遷高郵府推官未幾除國子助教日與諸生辨  
析六經六館之士資其陶甄者往往出爲名臣調應奉

翰林文字同知制誥兼國史院編脩官以病得告後召  
爲國子監丞除江浙儒學提舉改僉嶺南廉訪司事元  
史

凌懋翁字師德安吉人歷嘉興路總管

勞志

郊韶字九成吳興人能詩清麗温重沈子厚亦郡人通

史善爲詩游于樂府

鐵崖集

程郇字晉甫公許孫少有至行能文官婺源知州民懷  
其德致仕歸老植五柳于庭扁曰柳軒有柳退稿十卷  
勞志

許德彰篤志于學自號潛齋累辟不起

蒼雪野史

黃潛字晉卿本姓丁世居吳興祖應復浙西提舉曾祖

伯虎高祖曄俱進士其父鑄育于義烏之黃母童氏夢  
大星墜于懷有娠二十四月始生潛延祐二年進士歷  
知制誥兼國史院編脩官累翰林院學士兼經筵官追  
封江夏郡公謚文獻潛天資介特在州縣惟以清白爲  
治月俸弗給每鬻產以佐其費及升朝行挺立無所附  
足不登鉅公勢人之門君子稱其清風高節如冰壺玉  
尺纖塵弗汗然剛少容觸物或弦急雷霆若未易涯涘  
一旋踵閒煦若陽春潛之學博極天下之書而約之于  
至精剖析經史疑難及古今因革制度名物之屬旁引  
曲證多先儒所未發文辭布置謹嚴援據精切俯仰雍  
容不大聲色譬之澄湖不波一碧萬頃魚鼈蛟龍潛伏

而淵然之光自不可犯所著有日損齋稿二十三卷義

烏志七卷筆記一卷

元史

黃潛爲文章如澄湖不波一碧萬頃凡朝廷大詔令

皆出其手京師人呼爲壘口學士

李材解醒語

晉卿早年爲湖州長興吏因簿書被筆乃棄吏發憤

讀書登乙卯進士第爲世名儒

農田餘話

湖之歸安東七十里曰花城其鄉之好義者曰沈君家  
故業儒君之父處士公遺外聲利不有仕祿而樂出私  
財以振人之急謂親親仁民宜有本末次第首圖創義  
塾義莊以教養其族人未及就緒而卒君以爲前人之  
志不可不續爰以至正辛未捐田五百畝建義塾構殿

宇委先聖先師像其中以春秋脩釋奠之儀闢講舍齋  
廬延宿儒爲之師而聚族之子弟俾隨材以受業鄉人  
來學者弗拒也尋復捐田五百畝卽義塾之南立義莊  
屋以閒計者若干歲取其田之所入以實之擇族中之  
長且賢者同主其出納貧無給婚喪諸費者量厚薄之  
宜制隆殺之等而給焉大抵本于昔人之成規而微有  
所損益懼來者弗克嗣其志則以聞于外宰相執政及  
部使者咸詔如所請沈君名野先字進之今爲進義校  
尉江浙財賦都總管府照磨云

黃潛沈氏義莊記

牟應奎字文甫吳興人子才之孫爲黃巖州判官有著

政

黃巖縣志

魯琪琳烏程人爲人古朴忠實詩文雄壯不樂仕進沈  
原昭求詩法因詩示之云三百五篇風雅頌世人能讀  
少人觀吟哦須得自性情雕琢返愁失肺肝春草池塘  
中造化梅花香影外波瀾熟參熟究工夫到始信仙凡  
其一丹

西吳里語吳興絕倡集

史台孫吳興人歷江閩兩帥幕

詳藝文

沈國祥歸安人天性仁孝篤志好脩少游學浦江師事  
吳淵穎爲高弟揭後斯知其名會詔脩三史薦爲纂脩  
官不就隱居武康之仙臺山築一堂名曰逍遙堂優游  
樂道以終其身

沈氏譜

沈貫生而穎異博學勵行值勝國兵亂築舍獨蒼山杜



門隱居日與張羽夏儀甫諸君子相爲師友

蔣必勝字質甫別號容齋長興人教授高郵池州歷慶元主簿至元丁亥創東湖書院捐田隸之至治辛酉必勝弟居仁白有司轉聞于中書得書院額益以田二百四畝祀事無闕至元乙卯蔣克明復輟田百畝歸之由是稱義門蔣氏云

楊廉夫東湖書院記

史博字約之南潯人博極羣書尤邃于易時元世祖求南人欲用之遠近交辟皆不就

雲汀筆談

金文質號聽雪翁性豪蕩力學好吟善恢諧隱居不仕

長興志

劉鑄字季冶長興人性素剛鯁淹貫經史幼孤鞠于伯

父比長報以父禮李潛稱爲純德士平生交游多名流  
讀書天竺山從學者百餘人母死廬于墓側孝心篤至  
有仕族之欲妻以女鑄曰吾妻夫而得仕族女必不肯  
提甕出汲以脩婦道井曰之責鑄委之耶竟謝卻之既  
沒鄉人追悼爲之流涕著有燕石編傳家

萬姓通譜

陳潤祖東遷人宋參知政事存之孫以道德文章開發  
後進若太平尉趙彥恭松江教授倪子遠徽州推官吳  
本立衢州推官張安國皆其門人也潤祖中延祐甲寅  
浙江鄉舉第一仕至崑山同知孫曰鑾曰禮承家學有  
詩名著于時

烏程新志

朱嶸字山甫其先安吉人祖宋進士父力脩嘗館甥烏

程王氏因爲烏程人嶸篤學苦志延祐甲寅浙江鄉舉

乙卯張起巖榜進士任長洲縣丞

並上

徐養素號素菴居士德清人縝密寡言笑切劘經史至老無倦仕元爲翰林直學士與虞集同朝友善家居種德樂施名其堂曰積善未嘗挾貴富以驕人宋濂嘗有

跋積善堂紀後

麻谿徐氏譜

劉仲仁字彥德晚號曲肱道人讀書務實踐爲詩文不事藻飾旁通堪輿之術善畫山水人物得之者寶之在稠人中啗啗不肯出一語中年折其肱遂以爲號人皆惜其不果爲世用仲仁不加戚則曰生余者天成余者天曲余肱者天緣世而寧余生者亦天余何憾夫天其

能脫略世慮如此

臧衍長興志

談文禮德清人居邑南甫五齡父早世卽知哀痛號泣累日夜不休母潘氏矢節撫之賴以成立每伏臘享祀必思慕哭泣成禮又念母劬勞構奉萱堂朝夕供甘旨以營色養母亡居喪幾毀邑人閻仲彬繪圖名公題詠盈帙鄉里稱純孝博學能詩人勸之仕文禮弗屑隱居終身

德清新志

余元善雪川人至正十年任長泰縣尹

漳州府志

王禎烏程人至元中任紹興路總管

紹興府志

章同字克明又字元文號橫塘

正吉吳興絕倡集

韓友直字伯清號靜退老人又號介石

吳興絕倡集

止輔仁字友文歸安人少不樂華靡五經百氏悉研其  
歸元季張氏僞平章潘元明使人召之輔仁遁至洪武  
初始歸

張安國字世昌烏程人少有才名仕元爲衢州路推官  
子溥字伯源國初授北平省檢校永樂中累遷文華殿

大學士

勞志

張安國詩云右文儲硯一百九鈿匣珠囊漢瓊玖館

閣錄止云祕閣硯七十五耳

研北雜志

張按嘉興志載世昌撰石縣尹善政碑云浙閒宰令  
之賢必以嘉興石君爲首余昔居霄上固稔聞之又  
閔氏譜載至順閒崇順菴蘭若記亦世昌筆則世昌

乃其名也

張文蔚字楸實吳興人工文章嘗爲楊參謀誅參謀名

椿死于張士誠之難

見吳苑菴集

錢鼎字德鉉號艾衲生吳興人從楊廉夫讀書雲間一室如破舟啜菽飲水力學不怠以古文辭名洪武癸丑冬舉明經任國子學錄

松江新志

國初徵在野之士入京考禮吳興牟魯仲望

謝肅密庵

稿

嚴應雷烏程人當元末擁素封之貲孝行內篤仁恩外  
浹脫守臣之家難周故官之廩餼拯溺解厄惟日不足

子震直官至工部尙書

流芳錄

吳興備志卷之十二

吳興備志卷之十三

烏程董斯張遐周巢編

筭禕徵第六

孔氏婦吳興人寡而有子八人皆訓以義方晝耕夜讀  
漢哀帝時俱爲郡守

韋昭吳志

此已載郡志古跡孔姥墩下今出之

晉吳興孝廉鈕滔母孫氏名瓊富春人能文章

藝文類

聚隋經籍志

晉鈕滔母孫瓊答虞吳國餉胡桃書編云劍滔答吳

國誤

花編

潞州沈尙書詢宣宗九載主春闈將欲放榜其母郡君



夫人曰吾見近日崔李侍郎皆與宗盟及第似無一家之謗汝叨此事家門之慶也于諸葉中擬放誰也

吳璽

沈氏相見問葉不問房

詢曰莫先沈光也太夫人曰沈

光早有聲價沈擢次之二子科名不必在汝自有他人與之吾以沈儋孤單鮮有知者汝其不慙孰能見哀詢不敢違慈母之命遂放儋第焉光後果昇上第擢奏芸閣從事三湘太夫人之朗悟儋亦感激焉

雲谿友議

宋沈淑雪川沈尙書之女著諸史一卷載貞女烈婦忠僕諸軼事

陶宗儀說郛

湖州烏墩鎮沈氏婢其鄰里呼之施孀婆者年六十餘髮兩髻明其尙處子也年二十爲沈氏婢會大疫主公

主母繼亡獨餘二女子十數歲無旁親可依爲生施卽備春旁舍或織草履與縫紉之事得錢以給二女且教護之至于長大擇良爲配更爲撫抱其子盡力奴事鎮人皆知敬愛之每大家出游則假守舍餘物滿前一毫不移也至今尙在

春渚紀聞

湖州孫略教授家婢名呂媪者服勤孫氏有年矣性謹朴無他能但常日晨起廚中取食器潔之聚所棄餘粒閒有落溝渠者亦拾取淘濯再於釜中或加五味煮食之未嘗一日廢也年七十餘一日微病卽告其家人曰爲我髡髮著五戒衣吾將去矣家人從之因起以左手結印而化家人遂龕置開元寺觀者餘月了無穢氣而

髮漸生因與剃之後一月一剃

並上

張按范蔚宗傳李次公近世田叔口傳阿寄施孀婆者不可爲萬世人臣法哉呂媪拾粒爲餐居然有小物克勤之風至臨行正念蟬脫俗緣與杜黃裳何異噫此二媪者何可以婢目之

魏國夫人管氏諱道昇字仲姬吳興之棲賢山人也夫人天姿開朗德言容功靡一不備翰墨詞章不學而能處家事內外整然歲時奉祖先祭祀非有疾必齊明盛服躬致其嚴夫族有失身于人者必贖出之遇人有不足必周給之無所吝至於待賓客應世務無不中禮合度心信佛法手書金剛經至數十卷

松雪齋集

眉公以仲姬爲泖上人想未見松雪志耳

寓公徵第七

余以天門金虎呼吸精泉羽檄星馳郊多走馬遂負帙游山蹠迹志道備歷且岳林壑必過乃于太山見劉會稽博識洽聞徧于數術余因受業頗染所由余時問曰數有窮乎會稽曰吾曾游天目山中見有隱者世無知其名號曰天目先生余亦以此問之

漢徐岳數術記遺

施延沛國蘄人明五經星官風角家貧嘗遇海鹽賃作半路亭以養母時馮敷爲督郵至知其賢者下車謝請入亭與飲食脫衣與之餉錢不受後居烏程順帝初就徵歷大鴻臚陽嘉二年八月己巳拜太尉四年四月甲

子以選舉事策罷魏黃初中詔曰故漢先賢太尉施延等二十四人竝立忠貞之節咸脩清白之行邪佞所讒禍及其身若有遺嗣宜顯舉之又令有司圖像以祀子三崇清河太守咸魏郡太守憲東萊太守皆有異材董卓聞其名將引用之皆潛匿不出憲子良官至尙書今烏程縣西二十四里有延墓

參後漢書蕭廣濟孝子傳

海鹽安吉二志

太尉沛國施延清公潔白進士許國臨難不顧名著

漢朝

陶潛集聖賢羣輔錄

黃初詔及延三子已列郡志第以延爲郡人殊誤特

正之

敢山在德清或云吳丞相闕澤所居當作闕

談志

葛仙山在烏程縣南晉葛洪隱此有煉丹竈搗藥臼職方圖志云葛洪煉丹處天下十有三烏程居其一卽此山也

西吳里語

戴山在烏程晉戴逵嘗居之

勞志

晉康彤其先康居國人漢靈帝時移附中國獻帝末亂移知吳興彤冀州別駕

高僧傳

彤卽曇諦之父也

南宋竺彌字道綸本外國人居吳興父母亡哀痛瘠毀冬不衣襦袴生時畏雷每至天陰輒馳至墓伏墳哭有白兔在其左右

王歆孝子傳

王敬弘字裕之爲宋武諱以字行元嘉三年爲尙書僕射關署文案初不省讀嘗預聽訟上問疑獄敬弘不對上變色問左右何故不以訊牒副僕射敬弘曰臣乃得訊牒讀之正自不解上甚不悅六年遷尙書令固讓表求還東上不能奪改授侍中特進左光祿大夫及東歸車駕幸冶亭餞送十二年徵爲太子少傅敬宏詣都上表固辭不拜東歸上時不豫自力見焉十六年以爲左光祿大夫開府儀同三司侍中如故又詣都表辭竟不拜東歸二十三年復申前命復辭敬弘形狀短小而起坐端方桓玄謂之彈碁發八勢所居舍亭山林澗環周備登臨之美故時人謂之王東山文帝嘗問爲政得失

對曰天下有道庶人不議上高其言左右嘗使二老婦  
女戴五條瓣著青紋袴襪飾以朱粉女適尙書僕射何  
尙之弟述之敬弘嘗往何氏看女遇尙之不在因寄齋  
中臥俄頃尙之還敬弘使二婦女守闔不聽尙之入云  
正熱不堪相見君可且去尙之于是移于他室敬弘性  
貞正先是徐羨之傅亮當朝不與來往及致仕隱吳興  
與子瓚之書深勛以靜退瓚之爲五兵尙書未嘗詣一  
朝貴江湛謂何偃曰王瓚之今便是朝隱瓚之子秀之  
爲尙書又不與王儉款接三世不事權貴時人稱之後  
爲輔國將軍吳興太守

王韶之少有志尙當世詔命表奏輒手自書寫義熙隆



安時事大小悉撰錄位瑯琊郎中令韶之家貧好學嘗  
三日絕糧而執卷不輟家人誚之曰困窮如此何不耕  
答曰吾常自耕耳父偉之爲烏程令韶之因居縣境好  
史籍博涉多聞初爲衛將軍謝珍行參軍得父舊書因  
私撰晉安帝陽秋及成時人謂宜居史職後爲吳興太  
守撰孝傳一卷文集行于世宋廟歌辭韶之所制也

宋

隱鳴在安吉相傳陶弘景嘗隱處

勞志

安吉有梁周弘讓故宅弘讓之弟弘政爲安吉縣令弘  
讓結宇山中耽玩文史宅在縣南三十六里

談志

駱祕道臨安人梁安成王田曹參軍卽駱牙之祖也今

長興駱灣有祕道故宅

參陳書長興志

伏挺字士標平昌安丘人太清中客游吳興侯景亂中卒著邈說十卷文集二十卷

梁書

唐吳珙吳頊吳崧皮光業林昇羅隱何肅韓必居于吳興長城之八座山時號八友

此條載郡志山川類今出之

羅隱字昭諫新登人隱本名橫凡十上不中第遂更名少聰敏作詩著文以譏刺為主錢鏐辟爲從事朱溫以諫議召不行開平中羅紹威推爲叔父表授給事中所著江東集十卷甲乙集十卷淮海寓言讒書五卷湘南雜稿吳越掌記集一卷

見吳越備史文獻

通攷

蕭存字伯誠廣陵人穎士子也亮直有父風能文詞與韓會沈既濟善顏真卿在湖州與存及陸鴻漸等討撫古今韵字所原作書數百篇歷殿中侍御史

新唐書

上人生于會稽本湯氏子聰察嗜學不肯爲凡夫因辭父兄出家號靈澈字源澄從越客嚴維學爲詩維卒乃抵吳興居何山與詩僧皎然游講益至皎然以書薦于詞人包侍郎侂包得之大喜又以書致于李侍郎紆是時以文章風韻主盟于世者包李以是上人之名由二公而颺如雲得風柯少葉張以文章接才子以禪理悅高人風儀甚雅談笑多味

權德輿靈澈詩集

初靈澈在吳興居何山與畫公爲侶時予方以兩髦  
執筆硯陪其吟詠皆曰孺子可教

劉賓客澈上人文

集紀

世之言詩僧多出江左靈一導其源護國襲之清江  
揚其波法振沿之如么弦孤韻警人人耳非大樂之  
音獨畫公能備眾體畫公後澈公承之

畫公居吳興

並上

賀知章一代異人天機卓絕不入名法轍迹而放意縱  
適超詣縣解晚年尤縱誕極飲狂肆元和己亥知章已  
百年矣往來會稽武夷吳興山水間以藥爲市賴以濟  
廣川畫跋詳藝文

賀知章字季貞會稽永興人自號四明狂客又稱祕  
書外監遨游里巷醉後屬詞動成卷軸文不加點咸  
有可觀又善草隸書好事者供其牋翰每紙不過數  
十字其傳寶之先是神龍中知章與越州賀朝萬齊  
融揚州張若虛邢巨潤州包融俱以吳越之士文詞  
俊秀名揚于上京朝止山陰尉齊融崑山令若虛兗  
州兵曹巨監察御史融遇張九齡引爲懷州司戶集  
賢直學士數子人間往往傳其文獨知章最貴

參兩

唐書

顧雲大順中制同羊昭業等十人脩史雲至江淮遇高  
逢休諫議時劉子長僕射清名雅譽充塞搢紳其弟崇

望復在中書雲以逢休與子長舊交將造門希致先容  
逢休許之久矣雲臨歧請書逢休授之一函甚草創雲  
微有惑因潛啟閱之凡一幅竝不言雲但曰羊昭業等  
擬將一尺三寸汗腳蹋他燒殘龍尾道懿宗皇帝雖薄  
德不任被前件人羅織執大政者亦太悠悠雲歎而已  
唐摭言雲寓吳興見吳越備史

鳳策聯華三卷唐虞部郎中淮南從事秋浦顧雲垂  
象撰多以擬古爲題蓋行卷之文也雲咸通十五年

進士

陳振孫書錄解題

郎簡字叔廉臨安人知明州以工部侍郎致仕年八十  
九贈吏部侍郎簡和易喜賓客號武林居士導引服餌

尤好醫術有集驗方行于世

宋史

郎簡侍郎慶厯閒能吏與杜岐公極相厚善簡長岐公十餘年以兄事之既老謝事居里中築別館徑山下善服食得養生之術卽徑山澗旁種菖蒲數畝歲采以自餌山中人目之菖蒲田

蒙齋筆談

張按簡與吳興六老之會安吉志亦以爲州人與宋史小乖或由臨安寓苕也其子淑馮京榜進士載郡志則簡之老于吳興信矣

何蓮浦城人自號韓青老農夫去非東坡薦爲武學博士蓮嘗寄居烏墩撰春渚紀聞十卷

書錄解題

丹陽集四十二卷後集四十二卷顯謨閣侍制江陰葛

勝仲魯卿撰洪慶善序其文有所謂絕郭天信拒朱勳  
慚盛章而怒李彥者蓋其平生出處之略也再知湖州  
後遂家焉

並上

盛允升字德常其先建德人父僑直集賢院知越州宦  
游吳興樂其山水因家焉允升資稟端亮力學問喜爲  
文辭采贍蔚有吏能政和二年歷司開封戶曹朝廷方  
考正徵角二聲允升上樂書數萬言論辨古樂府以析  
用中正之法甚悉改儀曹兼大晟府製造官燕樂成徽  
宗命輔臣覆視允升所著精妙歷遷朝請大夫

沈與求

盛公行狀

王升字逸老寓烏戍自號羔羊居士所居有聖采堂得



柳軒樓異監鎮時與往還工草書殊有旭顛轉摺態度  
宣和閒以草書聖經上進除書錄其書尤爲內庭稱賞  
又兼能畫

書史參樓鑰錢惟善飲中八仙歌題跋

張嶠字巨山襄陽人宣和三年上舍選中第歷利州路  
安撫司幹辦公事以母病去官紹興中召對嶠上疏論  
邊事召試除祕書省正字再遷著作郎出爲福建路轉  
運判官上疏略曰古之人君其患有二不在于拒諫在  
納而不能用在在于不知天下利害在知而不以爲意  
陛下渡江十年矣今皆以爲當然而更爲迂濶之事此  
近于納諫而不知用知利害而不知恤也除司勳員外  
郎金人叛盟上命兩省卿監郎曹各草檄獨取嶠所進

者播之四方擢中書舍人升實錄院脩撰未幾右正言  
万俟尙論嶠罷去後起知衢州與祠時方脩好息兵朝  
廷講稽古禮文之事嶠作中興復古詩以進

宋史

嶠寓居武康見郡志

張嶠爲司勳郎官金人再取河南秦相皇恐上章引  
伊尹善無常主及周任不能者止之文以自解嶠之  
筆也秦德之遂擢脩注掌制而嶠具稿倉卒誤以伊  
尹告太甲爲告湯及周任之言爲孔子自言時祕書  
省寓傳法寺有書其門曰周任爲孔聖太甲作成湯  
秦疑諸館職爲之多被逐然嶠亦以答檜三折肱之  
語謂其貳于己無幾亦罷

文獻通攷

王洋字元渤待制資孫子亦以省第二名中宣和二年甲科紹興初以右贊善命管直徽猷閣歷典三郡所至有異效官太學爲博士時實代秦丞相而直道正辭亦擯勿用晚守番陽洪忠宣適以說虜歸人無敢過其居公獨脩舍故坐事免去葉少蘊嘗爲公言劉貢父爲漢史詩以爲杜詩功曹非復漢蕭何爲設用事信乎公曰高紀蕭何爲主吏孟康注曰功曹也王定國猶知之時史豈誤哉少蘊歎服有東牟集三十卷行于世周丞相益公爲之序

嘉定山陽志

洋居德清之石壁山見勞志

韋嵩岳州人隨宋高南渡尉武康悅故鄣山水之勝因

家長興

張東沙故鄣韋氏譜序

時氏彭成大族渡江而南居吳興曰衍之卒官朝請大夫成都運判子五人雋登進士科傑侃佐行以任入官張于凱贈時起之序

胡舜陟嘗勺祠居吳興之射邨子仔遂家茗谿焉

漁隱

叢話

舜陟績谿人歷御史中丞廣西經略以忤秦檜貶洪元英嘗言舜陟之得人心雖古循吏無以過也仔弟仰亦爲郎官見談鑰志

胡舜申泗州錄云宣和乙巳予家寓居泗州之教授廳聞太原失守知淮泗不可居借船于發運方孟卿遂得

親來湖州船纔過閘卽潮落不可復開而泗州尋亦亂

矣玉照新志

舜申避亂錄云先兄待制舜陟字汝明建炎己酉十月移兩浙宣司參謀時周望爲宣撫虜自廣德由安吉抵錢塘渡江破明州越北還假道犯平江望走青龍城不戰而破望嘗不快于韓世忠聞望竄遣將董旦邀虜旦至許浦見待制遂邀以行弟舜舉姪仔徑走吳興惟予侍家君朝散同待制及令人等從至焦山先是世忠旣塞閘口之河虜人別開一河出江予家隨例起碇以下至垂山風適順乃張帆而下韓軍望見有呼住者予令勿應船中有韓軍二卒亦令船

住勿聽稍行遠語二卒待吾家至蘇湖以金帛遣汝  
回否則無好到汝也二卒顧勢俯首船至平望東風  
又發一帆至吳興時望軍已至吳興矣凡曲折得風  
自垂山至吳興眞天以相吾也老幼皆安然而歸始  
見弟妹已抵吳興旬日待制乃遣使臣以書爲信寄  
謝世忠董學輩因送二卒往仍取行李告敕之寄軍  
中者以歸

並上

朱勝非自紹興四年九月罷相居湖州嘗就除知本州  
旣而得提舉洞霄宮食祠祿八年寓天聖僧舍杜門卻  
掃留心內典與世事相忘十四年十二月乙亥卒右迪  
功郎安誠曾授勝非辟爲江西帥屬于佛寺飯僧自撰

疏文訕及朝政爲郡守所發詔停誠官惠州編管

宋宰

輔編年錄

秀水閒居錄三卷雪川朱魯公丞相勝非寓宜春時  
作秀水者袁州水名也一編之內于南渡諸公行事

貶駁無全人

清波雜誌書錄解題

曾協南豐人翰林學士肇孫也年十九以詞賦魁胄監  
一上不第考古著書有雲莊集行于世終朝奉大夫知  
永州協始居湖之德清子南仲隆興元年進士知温州  
有惠政葛文定公邴鎮越以最列除尙書戶部郎中充  
金國正旦國信使將行值憲聖慈烈之喪授館燕山凡  
命宴皆請去樂及罷燕射虜悉勉從尋爲福建轉運副

使首廉所部疾苦良愿無擾姦無容欺歷擢刑部侍郎  
集英殿脩撰晚年意在簡默自號覺翁因以名菴好學  
不倦凡所述作溫潤典雅有覺菴集子掄監嘉興府都

稅務孫仲良登仕郎

樓鑰攻媿集

成閔字居仁邢州人靖康初應募捍金兵高宗南渡韓  
世忠追苗傅及龔兀朮討范汝爲閔皆在戎行積功至  
保寧軍承宣使紹興二十四年拜慶遠軍節度使超拜  
太尉主管殿前司公事御史劾之罷太尉婺州居住乾  
道初聽自便歸湖州

宋史

李迎字彥將河陽人知湖州歸安縣以外艱不赴歷安  
撫司機宜寓湖州新市蕭寺中手鈔聖賢治心養性之



學時賦詩自樂類成百篇嘗自贊曰三仕三已應緣而  
止一止一壑倦游而歸以子貴累贈中奉大夫子結度  
支員外郎縮平江參軍綺知如皋縣孫大成青陽尉大  
雅主太平簿大均興化尉

周必大李迎墓志詳藝文

濟谿老人遺稿一卷通判明州濟源李迎彥將撰永  
嘉周浮沚先生之壻與先大父爲襟袂集中有送先  
君子越戊子秋試詩首句籍甚人言易已東蓋先君  
治易故也集序周益公作

書錄解題

李結字元明河陽人迎子也慕元次山之風因以次山  
自號卜築雪上日扁舟寅緣葦間漚來相從百轉不止  
名爲漁社後以尙書郎奉使全蜀凡六十一郡之官吏

數十萬之將士莫不欽受約束乃念舊社不置繪漁社圖周必大敘之

武康寓客任公紳諫議古之從兄也靖康失母長齋泣血以求之虜歸我河南徒步走北方奉之以歸孝行上聞擢敕令所刪定官改秩主管官告院母終廬墓事之如生與世相忘久矣武康令方道訪其家列其高節于朝控懇備至遂賜金紫聞者欽歎風化之美

攻媿集

黃龜年字德邵號竹谿先生福州人葬父于鄞因家焉舉進士爲殿中侍御史與諫官劉棐論秦檜檜由是罷至再相龜年寓湖州檜撫其過押回福州檜死復居鄞寧波府志參氏族大全

龜年永福人累官尙書左司員外郎遷殿中侍御史  
會王倫來歸龜年劾檜主和誤國併劾檜黨檜與祠  
龜年又奏檜厚貌深情矯言僞行上不畏陛下中不  
畏大臣下不畏天下之議章凡三上遂褫檜職累遷  
中書舍人兼給事中司諫詹大方希檜意論之落職  
宋史

畢再遇兗州家將也開禧用兵諸將多敗事獨再遇累  
有功金人認其旗幟卽避之屢遷鎮江都統制揚州承  
宣使驍衛上將軍後致仕居于雪

癸辛雜識

再遇字德卿以武信軍節度使致仕贈太師諡忠毅  
再遇姿貌雄傑早以拳力聞屬時寢兵無所自見一

旦邊事起諸將望風奔衄再遇遂爲名將

宋史

吏部侍郎萬鍾字元亨家世錢唐自爲司農卿時卜宅

于安定門橫塘

談志

衢按杭志紹興二十四年榜黃鐘注淳祐志作萬鍾  
又孝行傳范鍾字元亨臨安人父居市肆貨巾幘蓄  
婢生鍾婢約滿去不復聞鍾浸長讀書取科第授縣  
尉常欲訪母無從偶經雪川見渡口茅屋中嫗單身  
鬻餅餌甚苦鍾感之詢其往跡皆母事也且云少傭  
臨安巾肆中嘗生子今傳已入官恐貧賤不相認故  
獨勞耳鍾徵其子所生年月日皆與已合鍾大悲喜  
卽拜認之嫗倉卒未敢當鍾曰阿母無棄兒也遂具

衣迎歸後鍾紹郡符持使節登華要嫗皆及享其養  
意卽一人以萬爲范字魚魯耳

同姓名錄云孝宗初卽位時萬鍾試工部尙書使金  
賀正旦與志持使節語合又理宗時自有蘭谿范鍾  
爲左丞相見宋史

詹體仁字元善浦城人光宗卽位累遷太常少卿上以  
積疑成疾久不過重華宮體仁陛對首陳父子至恩之  
說謂易于家人之後次之以睽睽之上九曰見豕負塗  
載鬼一車先張之弧後說之弧匪寇婚媾往遇雨則吉  
夫疑極而惑凡所見者皆以爲寇而不知實其親也孔  
子釋之曰遇雨則吉羣疑亡也蓋人倫天理有閒隔而

無斷絕方其未通也湮鬱煩憤若不可以終日及其醒  
然而悟泮然而釋如遇雨焉何其和悅而條暢也孝宗  
崩體仁率同列抗疏詣重華宮親臨祥祭辭意懇切寧  
宗登極天下晏然體仁與諸賢密贊趙汝愚之力也孝  
宗將復土體仁言永阜陵地勢卑下非所以妥安神靈  
與宰相異議除太府卿尋直龍圖閣知福州言者竟以  
前論山陵事罷之退居雪川日以經史自娛人莫窺其  
際真德秀早從其游嘗問居官莅民之法體仁曰盡心  
平心而已盡心則無媿平心則無偏世服其確論

宋史

朱考亭與饒廷老書云元善已如雪川其子假日至  
此見養子之說愕然曰丈人到彼又頭撞矣此語亦

有味因見仲本可閒及之又答林正夫云元善寓雪川殊不自安旦晚必歸

吳柔勝字勝之宣州人登進士第調都昌簿丞相趙汝愚知其賢差主嘉興府學教授將寘之館閣會汝愚去御史湯碩劾爲汝愚黨且主朱熹之學不可官師儒自是閒居十餘年嘉定初主管刑工部架閣文字遷國子正業柔勝始以朱熹四書與諸生誦習伊洛之學晦而復明遷太學博士又遷司農寺丞出知隨州收土豪孟宗政扈再興隸帳下後皆爲名將除京西提刑領州如故改湖北運判兼知鄂州改知太平州終祕閣脩撰奉祠卒諡正肅二子淵潛各有傳

宋史

柔勝紹興初占籍新市繼娶右正言沈濬女生淵潛

沈應升云

程大昌字泰之休寧人自宦游去鄉里樂吳興山水之

勝而卜居焉累遷權吏部尚書謚文簡

宋史周平園集

癸辛雜識云程文簡尚書園在城東宅後又云河口

程氏園文簡別業藏書數萬卷作樓貯之

北海集二卷北海王岵季夷撰淳熙閒名士寓居吳興

陸務觀與之厚善三子甲田申皆登進士擅名

文獻通

攷

陸游薦舉人材狀云從政郎前隨州州學教授王田

學問淹博議論開敏可備文字之職



李龔字和父荷澤人家吳興三匯之交效元白爲歌詩  
不樂仕進年登耄期自銘墓云孰生子孰死子自不知  
爲文之徒詩之徒

佩楚軒客談

李龔和父號雪林有漱石吟行于世

瀛奎律髓

吳興林憲字景思少從其父宦游天台因留蕭寺寓焉  
初賀參政允中奇其才妻以女孫而不取匱田貧甚爲  
詩學韋蘇州漳熙五年尤延之爲守爲作雪巢記又爲  
雪巢小集序柔櫓晚湖上寒鐙深樹中汲井延晚花推  
窗數新竹延之謂唐人之精者不是過

並上

雪巢小集三卷東魯林憲景思撰初寓吳興從徐度  
敦立游後爲參政允中子忱孫壻寓臨安其人高尚

詩清澹五言四韻古句尤佳殆逼陶謝梁谿尤延之  
誠齋楊廷秀皆爲之序且爲雪巢賦及記余爲南城  
其子游謁至邑以家集見示愛而錄之及守天台則  
板行久矣視所錄本稍多然其暮年詩似不逮其初  
往往以貧爲累不能不衰索也

陳振孫書錄解題

李心傳字微之隆州人道傳兄也心傳閉戶著書魏了  
翁等二十三人交薦寶慶二年以布衣詔爲史館校勘  
歷工部侍郎奉祠居湖州心傳有史才通故實所著成  
書有高宗繫年錄學易編誦詩訓春秋考禮辨讀史攷  
舊聞證誤朝野雜記道命錄西陲泰定錄辨南遷錄又  
有詩文一百卷

宋史理宗紀

按宋史心傳居潮州張攷道傳性傳俱寓吳興心傳  
宦蹟僅判成都府四川制置司參議初未嘗莅潮陽  
也何故違其二弟獨萬里乘桴冒蛟鱷之險耶今南  
林報國寺碑亦心傳撰性傳書宋史以湖爲潮誤矣  
特正之

李舜臣子心傳道傳性傳官太史游吳興悅山水之  
秀寓于郡城卽今安定書院又相度弁峰建宅營墓  
名其灣曰太史灣歿以道傳子獻可爲嗣遂爲吳興  
人後徙長興之東山卽余姻家李澄之世清之先也  
闕祁主政寧龍僉憲寬劉清惠公麟諸傳誌得其槩  
因意其昆弟三人偕至吾湖而郡學獨祠道傳則以

今茲繁衍者乃厥子姓耳如遯所自心傳尤當入寓  
賢而性傳亦未可遺也

閔元衢

張嘗據癸辛雜識及報國寺碑正宋史之誤近得康  
侯所示長興李氏譜自謂差有讀書眼耳

李性傳字成之嘉定第進士歷起居舍人兼侍講疏言  
東周以後諸侯卿大夫皆既葬而除服秦漢之際尤爲  
淺促孝文定爲三十六日之制則視孝惠以前已有加  
矣東漢以後又損之爲二十七日謂之以日易月則薄  
之至也干數百年惟晉武帝魏孝文爲能復古之制而  
羣臣沮格未克盡行惟孝宗通喪三年近古所獨陛下  
繼之至性克盡前列有光乞以此疏付之史館庶幾四

海聞風民德歸厚累遷權吏部尙書臣寮論舜臣立廟  
封爵事落職與祠漳祐中歷同知樞密院事未幾落職  
與郡復與祠寶祐二年與內祠兼侍讀以觀文殿學士  
致仕卒贈少保

宋史

李元綱字國紀錢塘人號百鍊真隱乾道間以上庠吳  
士寄居吳興之新市力學好古雖困窮操履益堅怡然  
自得不爲外物異端之所搖奪撰聖賢事業圖集說三  
先生西銘解厚德言行編諸書

杭州府志

周密嘗曰大父少傅素廉儉僑居吳興城西之鐵佛寺  
既移寓天聖佛殿者幾二十年杜門蕭然未嘗有毫髮  
至官府時楊伯子長孺守湖嘗投謁造門至不容五馬

車伯子下車顧問曰此豈侍郎後門乎爲之歎而去時  
寓公皆得自釀以供賓祭惟先公雖食醋亦取之官庫  
一日與客持螯醯味頗異常時因扣從來蓋先姑婆乳  
母所爲斗許以備不時之需者遂令亟去之曰畢竟是  
官司禁物家豈可有耶其清慎若此待子弟甚嚴雖盛  
暑未始去背子鞋襪

齊東野語

袁說友字起巖建安人隆興元年登第文辭豐蔚嘗爲  
四川安撫使輯成都文類一書楊廷秀有和袁起巖詩  
云道場山下弄山泉滄菊紉蘭萬物先魏華父輓袁詩  
云靈輻送無路淚灑雪谿風說友之寓苕審矣

參以聞

通志成都文類四川總志誠齋集鶴山集五書

說友嘗知臨安平江見蘇杭二志嘗知池州見昭明  
集跋說友號東塘居士見瀛奎律髓

三登橋在德清袁說友與張巖王大有嘗寄居于此

後皆登第故名

德清志

張按巖字肖翁廣陵人紹興末居湖州黨韓侂胄歷  
參知政事知樞密院見宋史其人無足述也王大有  
平江人乾道八年進士

說友事其兄直友謹宦浸達至參知政事直友無一  
錢食客輒爲萬錢具費皆出參政

葉適袁公墓志

趙與憲字德淵燕王八世孫希懌第三子居湖州嘉定  
十三年進士嘉熙三年直敷文閣知平江兼淮浙發運

使特置司領其事自與憲始四年郡中饑分場設粥以  
寓公方萬里爲人所推敬委請董役全活者數萬人寶  
祐三年以觀文殿學士再守郡行鄉飲射禮于學宮復  
脩飾殿堂齋廬廣絃誦以嚴教養學宮弟子爲立生祠  
明年兼提刑六年除江東安撫使知建康府景定元年  
復知平江句祠封周國公八月卒贈少師謚忠惠學者  
稱爲節齋先生

宋史參姑蘇志

元兩浙鹽場司丞永康胡長孺曰前此者四十四年  
長孺在虎林聞故老誦說趙忠惠公爲臨安尹會城  
中見口日食文思院米三千石常藉北關天宗水門  
米船入四千石則米賤二千石則米貴與日食適相



若則價固等候之無不中者爲平糴倉二十八厰鹽  
橋北糴湖秀蘇常米置碓坊春治精善歲六十萬石  
視米船之入不及日食輒以賤價平糴與民銷折本  
錢鉅萬竟忠惠公去十三年米價不翔民不食糲惡  
駟僧不罹刑辟噫良尹哉今口籍除去乘來與故時  
不甚殊若牧守能做忠惠時規募民亦效蔣孚順昆  
弟饑歲尙使弗知況平歲耶右史徐元杰暴亡程公  
許亟奏于朝紳中選公正明決無所顧忌者專莅其  
事分列首從必誅無赦疏入不報物論沸騰臨安尹  
趙與憲奏乞置獄天府帝從之公許繳奏與憲乃嵩  
之死黨乞送大理寺命臺臣董之詔殿中侍御史鄭

案案回儒首鼠事竟不白然公論莫不偉公許

宋史

新編

公許寓吳興見掌故

陳貴誼字正甫福清人父宗召字景南因贅而居崑山  
淳熙二年登第歷工部尙書後寓武康貴誼亦卜居焉  
慶元五年進士又中博學宏詞科歷太學博士時議更  
楮幣法貴誼轉對言楮券之令使姦惡得逞道路怨咨  
非所以祈天永命固結人心主議者摘其熙寧新法之  
語激怒時相再遷將作監丞兼魏惠憲王府學教授遷  
祕書郎出知江陰軍提舉江西常平召赴行在未至授  
禮部郎官屬金人大擾淮蜀又指陳時弊彌遠滋不樂

諷言者論罷主管崇禧觀起知徽州召授司封郎官兼翰林權直理宗卽位累遷中書舍人升兼直學士院內侍濫受恩賞輒封遣詔書遷至參知政事兼同知樞密院事出師汴洛時已移疾猶上疏力爭五上章乞歸轉四官加邑封致仕卒贈少保資政殿大學士

宋史新編

參魏鶴山崑山志

丁大全與董宋臣表裏濁亂朝政牟子才累疏辭歸初子才在太平建李白祠自爲記曰白之斥實由高力士激怒如子以報脫鞵之憾也力士方貴倨豈甘以奴隸自處者白非直以氣陵亢而已蓋以爲掃除之職固當耳所以反其極重之勢也彼昏不知顧爲逐其所忌力

士聲勢益張宦官之盛遂自是始其後分提禁旅喋血  
宮闈雖天子且不得奴隸之矣又寫力士脫鞵之狀爲  
之贊而刻諸石屬有拓本遺宋臣宋臣大怒持二碑泣  
訴于帝乃與大全合謀喉御史交章誣劾子才在郡公  
燕及餽過客爲入已降雨官猶未已帝疑之密以槩問  
安吉守吳子明子明奏曰臣嘗至子才家四壁蕭然人  
咸知其清貧陛下毋信讒言帝語經筵官曰牟子才之  
事吳子明乃謂無之何也眾莫敢對戴慶烜曰臣憶子  
才嘗繳子明之兄子聰帝曰然事遂解蓋公論所在雖  
仇讐不可廢也子才事親甚孝弟子方客死公安挾其  
匱葬安吉女弟在眉山拔其家于兵火致之安吉在吉

州文天祥以童子見卽期以遠大所薦士若李芾趙卯  
發劉黻家鉉翁皆爲忠義士平江守吳淵籍富民田以  
千餘畝遺子才皆卻之身後家無餘貲賣金帶乃克葬  
宋史

胡崇字宗叟歙人登淳熙四年第忤賈似道差知撫州  
似道嗾江西安撫曾淵子俟崇至陰圖中傷崇見幾勇  
退寓居吳興龜谿之上似道南竄以將作大監召命下  
而世運新矣徒步歸歙

洪焱祖胡大監傳

陳存字體仁龍泉人太學上舍淳祐七年第三人文章  
政事皆有聞譽仕至兵部尙書端明殿大學士知慶元  
府沿海制置使

栢蒼彙紀

戴表元序陳無逸詩稱其祖龍泉公居湖卽存也壽  
昌徐文鳳從吳興陳本齋先生存受春秋故其經學  
卓有原委權知象山縣以慈惠稱本齋開闢沿海辟  
入簽廳咨決庶務全活者尤

衆嚴州府志

度宗時詔卿監以下薦人才將作監楊文仲薦陳存  
王柏等十有八人皆名士也

宋史

按癸辛雜識引周彌陀事云陳本齋馬裕齋俱湖州  
人本齋者陳尙書存裕齋者馬參政光祖也本齋已  
詳寓公攷宋史光祖字華父金華人寶慶初進士歷  
參知政事知樞密院有理劇才風節凜然諡莊敏觀  
公謹所云馬亦吾郡寓公他書未之及耳

衛富益崇德人幼有異質識見高遠不爲章句學嘗負笈往從金仁山學深探易理金卒復受業于許白雲白雲重其器識以友處之悉究性理默識心融許卒以義制服旣而歸曰生何與草木禽獸同朽腐哉自以先世歷蒙宋澤恥罹彝元聞宋亡于崖山日夜悲泣設壇具祭文天祥陸秀夫等詞極哀慘觀者無不墮淚又歎夷齊何人耶馮范何人耶遂決意不仕隱居教授創白社書院于石人涇春秋社日祀先聖鄉賢會布衣友賦講道搢紳仕元者不得就列風度飄然士林高之至大閒有司欲薦聞不就怪其迂毀其書院遂攜仲子隱于湖之金蓋山學者翕從所著四書考證性理集義易經集

說讀書纂要耕讀怡情等錄至治閒長子迎養還故里  
自號耕讀居士絕不言世務不履城市或有乞詩文者  
辭曰吾欲胸中涵養德性而已有何說爲嘗語諸子曰  
士之品三道德爲上功名富貴何足慕哉一日遭微疾  
取所著書悉焚之曰吾志晦迹況玄奧處宋儒究盡安  
用留此糟粕耶平生推崇儒術闢異端表裏洞澈動定  
坦夷接人無貴賤親疏賢者服其德不賢者服其化卒  
年九十六門人沈夢麟黃彛鄭忠相率制服葬于舊隱  
金蓋山私謚曰正節先生正德閒劉督學瑞贊曰遠宗  
正學獨抱遺忠

崇德志

史光蜀青神人嘉熙戊戌光年十二以避難遷湖州光



之居湖也廣自植立遂以武科奮積官武翼郎浙東兵馬都鈐轄娶閔氏二子曰圭文故宋舉進士脩職郎瑞安府司戶參軍至大閒將教授平江之嘉定未上而卒曰璋文早世圭文之幼也聞母有疾痛不忍聽更以燼熬左右臂以代痛母疾止乃已武翼嘗病累月視藥未嘗解帶病亟哀號祈天願以己壽益父夢或告己曰感而孝念子三齡武翼果又三年乃終娶陳氏子三人台孫厯浙閩兩帥幕□□由舶司幕長將改除喜孫業進士孫六人名之曰淵源澄清潤澤蓋有所識也

虞集史

氏陳夫人墓志

龐樸字夷簡謙孺玄孫宋末補春秋員家松陵賈似道

聘爲塾師不赴錮不得試從方逢辰講學元初詔行臺御史程鉅夫訪南士徵不起強至再出授翰林脩撰兼禮部時敕脩宋遼金三史總裁脫脫同官多北人欲統金附宋樸曰昔曹魏有中原不附蜀漢元魏有中原不附齊梁此綱目所以重大統也今大元繼宋統近接漢唐遠接三代若承金統近接遼矣遼以上無聖可尊脫脫不從同事門人貢師道復力辨之擬轉外秩樸引歸寓居南潯趙孟頫陳孚咸與倡和自號五湖狂叟

龐氏家乘

袁桷字伯長慶元人舉茂才異等自號清容居士寓吳興大德間爲翰林國史院檢閱官時初建南郊桷進十

議多采之至治元年遷侍講學士桷在詞林朝廷制冊  
勳臣碑銘多出其手所著有易說春秋說清容居士集  
勞志

袁桷讀書吳興有清容書院臨茗谿對弁山後山題  
云人同綠水長爲主座有青山不計年

堯山堂外紀

平陽趙虞卿從其兄來吳興兄卒官虞卿因留不去蕭  
然逆旅無窮愁之色有饋者亦弗拒及遇人有不足輒  
與之無吝情尤以善弈名

松雪齋集

楊維禎字廉夫諸暨人舉進士署天台尹維禎爲文擬  
先秦兩漢詩尤名家有詔脩遼金宋三史維禎作正統  
辨千言司徒歐陽玄讀之歎曰百年後公論定于此矣

四海兵亂遂浪迹浙西山水閒明興天下大定詔徵遺  
逸之士脩纂禮樂書頒示郡國維禎被召至京師肺疾  
作而卒

勞志

楊鐵崖云吾未七十休官在九峰三泖閒殆且二十  
年優游光景過于樂天有李五峰張句曲周易癡錢  
思復爲倡和友桃葉柳枝瓊花翠羽爲歌歛伎第池  
臺花月主者乏晉公耳然東諸侯如李越州張吳興  
韓松江鍾海鹽聲伎高讌未嘗不居其右席則池臺  
主者未嘗乏也風日好時駕春水宅赴吳越閒好事  
者招致效昔人水仙舫故事蕩漾湖光望之呼鐵龍  
仙伯顧未知香山老人有此無也客有小海生賀公

爲江山風月福人且貌公老像又賦詩其上曰二十四考中書令二百六字太師銜不如八字神仙福風月湖山一擔擔

春水宅先生筋名眉公筆記

崔復錢唐人父謙遠祖晉與趙文敏有世契之好故復妻文敏孫仲穆女洪武六年徐大章爲銘其墓且云復有學行善繪事次子晟亦工篆隸晟字彥暉愛吳興山水營別業一區于弁山之麓號雲林小隱大章仍爲作記蘇平仲又爲作雲林小隱詞

茗記

### 藝術徵第八

神仙附

羽流附

吳興西湖民景養善相

詳封爵徵

子頤刺湖州行縣至長城方山其下有水曰西湖

舊

唐詩子頤傳

吳菰城嫗善相吾粲數歲時嫗見之曰是兒有卿相之骨粲後歷太子少傅

吳志

晉方士戴洋字國流吳興長城人也年十二遇病死五日而蘇言執麾將士將往蓬萊崑崙積石太室恆廬衡等諸山旣而遣歸

建康實錄

南宋正叡吳興人善卜筮

詳官師徐孝嗣

姚最僧坦第二子也最幼在江左迄于入關未習醫術天和中齊王憲奏遣最習之憲又謂最曰博士高才何如王褒庾信王庾名重兩國吾視之蔑如接待資給非

爾家比也勿不存心且天子有敕彌須勉厲最于是始  
受家業十許年中略盡其妙

後周書

朱肱吳興人進士登科善論醫尤深于傷寒在南陽時  
太守盛次仲疾作召肱視之曰小柴胡湯證也請并進  
三服至晚乃覺滿又視之間所服藥安在取以視之乃  
小柴胡散也肱曰古人製咬咀謂剉如麻豆大煮清汁  
飲之名曰湯所以入經絡攻病取快今乃爲散滯在高  
上所以胃滿而病自如也因依法旋製自煮以進二服  
是夕遂安因論經絡之要盛君立贊成書蓋潛心二十  
年而活人書成道君朝詣闕投進得醫學博士肱之爲  
此書固精贍矣嘗過洪州聞名醫宋道方在焉因攜以

就見宋留肱款語坐中指駮數十條皆有攷據肱惘然  
自失卽日解舟去由是觀之人之所學固異耶將朱氏  
之書亦有所未盡耶後之用此書者能審而慎擇之則  
善矣

泊宅編

王克明字彥昭樂平人徙湖州烏程紹興乾道閒名醫  
也魏安行妻風痿十年不起克明施鍼而步履如初廬  
州守王安道風噤不語旬日他醫莫知所爲克明令熾  
炭燒地灑藥置安道于上須臾而蘇金使黑鹿谷過姑  
蘇病垂死克明治之明日愈名聞北方張子蓋救海州  
戰士大疫克明時在軍中全活者幾萬人克明頗知書  
好俠尙義常數千里赴人之急初試禮部中選累任醫



官王炎宣撫四川辟克明不就炎怒劾克明避事坐貶  
秩後遷至額內翰林醫痊局賜金紫

宋史新編

吾鄉醫者龐良臣良材兄弟二人指上頗明最是暗記  
諸藥方不差分豪爲難能也吾鄉張神鑑瞽而善記胸  
中所儲無慮數萬每談一命則旁引同庚者數十皆歷  
歷可聽又有張五星亦瞽而慧善辨寶玉至于能別婦  
人妍醜聞其聲欬叩問數語卽知其人美惡情性趙信

國丞相專俾置姬妾并玉器云

癸辛雜識

宋湖州卜者牧羊子識章文敏于未遇時及仕再筮皆  
不許食祿果連丁艱旣而曰今可仕矣且不在外文敏  
果致兩府又常語醫者李屋父曰君當在都省中鄉人

傳以爲笑後文敏貴常招屋父留與共飯于都省閣因

舉舊話一笑

齊東野語

凌漢章湖州人少學針灸三殺人乃棄其針于水中針皆上浮水面漢章曰天命我矣拜而受之遂精研其術名動天下嘗至常熟寓東海湯禮家早起聞其鄰徐叔元家哭甚哀往問之乃其子婦以產難死叔元以爲不祥將昇出付火葬漢章急止之命其夫發棺揣胸前尙微溫出針下數穴良久子下婦得生又一跛翁扶杖過之自言少多瘡瘍有庸醫誤折針膝中今杖行二十年莫能愈漢章爲從肩臂上針三四穴折針從患處突出棄杖再拜而去

高坡異纂

鄉人顧謙弘治二年五月得疾夜見金冠綠袍者踞  
坐梁上室中懸藥胡蘆累百呼謙名曰我天醫也爲  
謙具說致病之故又授以數百言曰子能行此可爲  
名醫善記之勿忘也自是頓瘳而得耳聾至冬月往  
謁凌漢章求針治漢章爲針兩耳移時而愈曰子嘗  
爲天醫傳藥乎謙驚問所自知漢章曰大凡天醫治  
病傳藥耳中藥入而氣閉故聾也謙乃具言所見曰  
先生神人也然謙自病後追繹與人問答之語皆歷  
歷分明獨所授要言茫然不記一字

庚巳編

醫者意也得其方而不得其意爲庸醫其害可以殺人  
得其意而不局于方爲良醫其功足以濟世昔湖人有

患食戍肉停滯者諸醫悉用消導之劑元氣愈薄停滯愈不通垂絕延周用仁治之用人參大補之劑諸醫驚愕不踰時停滯大通矣驗之皆大塊戍肉蓋食時倉忙不暇細嚼所致也周名濟湖州儀鳳橋人

見聞雜記

沈立精堪輿之術自卜兆于重兆云後出宮妃今其孫爲宸妃

歸安志

高士弘字遵道歸安人精醫

勞志

畢文字士文歸安人工傳神

沈淵鑑烏程人遇異人授範圍數卜屢驗

並上

以下神仙及羽流

計籌山在武康越大夫計然嘗登此山籌度面勢以營

隱居久之道成躡山巔危石乘雲而去至漢葛玄煉丹其上戴表元昇玄觀記

薊子訓少而得道齊人少仕州郡舉孝廉除郎中又從軍除駙馬都尉人莫知其有道隱居湖郡之餘不鄉詳明方術解分身之術蓋異人也到洛見公卿數十處皆持斗酒片脯候之坐上數百人飲啖終日不盡去後數十處皆白雲起從旦至暮時有百歲公說小兒時見訓賣藥會稽市顏色如此訓不樂居洛遂遁去正始中長安東壩城中有見之者與一老人摩娑銅人曰適見鑄此已近五百歲今烏程湖跌山有訓墓

神仙傳參王儉

姓系西吳里語

五山在安吉西南四十六里高三千六百尺山有五峰昔鄉民姚紵嘗于此采樵忽見二人弈棋紵坐斧柯觀之不覺其久二人謂曰汝可還去汝家今日爲汝祥矣紵所坐之斧其柯已爛及還家因入甕中隱身謂家人云可七日勿開日限未至家人開之紵化爲白鶴飛去五山今一名弈山

談志

施淑女山陽人施績女也績吳興人孫皓時爲驃騎將軍守西陵今云山陽恐女或出適取夫家郡不爾則乖昔世有仁行令聞得在洞中易遷館東廂中

陶隱居真

誦

沈羲者吳興人學道蜀中消灾治病功德感天天神識

之羲與妻賈共載詣子婦卓孔寧家還逢白鹿車一乘  
青龍車一乘白虎車一乘從者數十騎皆朱衣杖矛帶  
劍輝赫滿道問羲曰君是沈羲否羲愕然曰是也騎人  
曰羲有功于人心不忘道履行無過壽命不長黃老今  
遣仙官來迎侍郎薄延之乘白鹿車是也度世君司馬  
生青龍車是也迎者徐福白虎車是也須臾有三仙人  
羽衣持節以白玉界青玉簡丹玉字授羲羲不能識遂  
載羲昇天昇天時道間鉏耨人皆共見斯須大霧霧解  
失其所在但見羲所乘車牛在田食苗或有識是羲車  
牛以語羲家弟子恐是邪鬼將羲藏山谷間乃布于百  
里內求之不得四百餘年忽還鄉里推求得數世孫名

懷喜告曰聞先人說家有先人仙去久不歸也留數十  
日說初上天時云不得見帝但見老君東向坐左右敕  
羲不得謝但默坐而已宮殿鬱鬱如雲氣五色玄黃不  
可名狀侍者數百人多女少男庭中珠玉之樹眾芝叢  
生龍虎成羣遊戲其間琅琅如銅鐵之聲不知何等四  
壁熠熠有符書著之老君身形略長一丈被髮文衣身  
體有光耀須臾數玉女持金椀玉杯來賜羲曰此是神  
丹飲者不死夫妻各一杯壽萬歲乃告言飲服畢拜而  
勿謝服藥後賜棗二枚大如雞子脯五寸遺羲曰齋還  
人間治百姓疾病如欲上來書此符懸之竿杪吾當迎  
汝乃以一符及仙方一首賜羲羲奄忽如寐已在地上



多得其符驗也

太平廣記

沈羲武康人躬耕于野忽棄耕亡去家人求之不得子孫相傳以爲羽化齊永明二年歸訪舊里呼諸孫謂之曰吾是汝四世祖在蜀以符藥治病有活人功上帝授吾爲碧落侍郎今歸以告汝倏忽不見邑人駭異建道觀塑像以奉之宋崇寧大觀閒有內庭女道官孫千霞夢一道士披彩霞衣言曰吾武康人也

在碧落中與子有宿緣他日當遇于彼及靖康亂千霞避地南方依石防禦防禦者家于德清之韶邨始知武康爲吳興也一日石氏設醮羽衣畢集道士姜景良與焉千霞以其夢告景良曰吾邑沈羲也千霞

急走義祠瞻塑像曰眞吾夢中所見也遂捐金徧施  
黃冠而去後千霞于富陽太元山授徒數百人年八  
十有九忽髭髯叢生越三年而羽化今縣有仙人渚  
石湖梯世傳義登仙之處

武康志

陸脩靜吳興東遷人宋文帝召入內殿時太后王氏雅  
信黃老降王后之尊執門徒之禮

珠囊

脩靜早爲道士置館廬山時遠法師居東林其處流

泉巾寺下入于谿每送客過此輒有虎號鳴因名虎  
谿後送客未嘗過獨陶淵明與脩靜至語道契合不  
覺過谿因相與大笑世傳爲三笑圖宋泰始三年羽  
化于京師賜諡簡寂以故居爲觀

張按三笑圖別有辨在瓊徵

太始七年四月戊申夜京邑崇虛觀堂前有黃氣狀如寶蓋高十許丈漸有五色道士陸脩靜以聞脩靜字見寂蹠有重輪足有雙踝掌有大字背有斗文篤好文籍旁究象緯及長好方外游南寓衡湘九疑訪南真之遺跡西至峨眉西城尋清虛之高躅宋元嘉末市藥京邑文帝召不往乃友陶淵明慧遠于廬山明帝泰始三年詔江州刺史王景禮聘來朝授館于外又敕會于華林延賢館王公畢集脩靜席巾謁帝而升帝肅然起敬遂以父季真取到上清經法付之總括三洞爲世宗師仍敕此郊天卽立卽崇虛館建

傳經宗壇教法大備矣明年帝疾卽其館脩金錄一  
夕有黃氣如寶蓋狀彌壇字帝感異夢疾乃有瘳所  
著齋法儀範百餘卷元徽五年正月忽若趣裝還舊  
山弟子皆訝之乃三月二日倏然解化時廬山諸徒  
屬共見霓旌藹然聞空中有言曰上清監仙大夫降  
俄而敕送冠履還山詔所居爲簡寂觀

茅山志

脩靜餌菜萸有菜萸鳴在蔣山平坡

太平清話

陸先生善鼓琴

王梅谿簡寂觀詩注并見陶隱居真

誥

張融年弱冠脩靜以白鷺羽衣遺之曰此異物奉異

人也

南史

馬湘字自然杭州鹽官人也世爲縣小吏而湘獨好經史攻文學治道術徧游天下後歸江南而嘗醉于湖州墜雪谿經日方出衣不沾溼坐于水上而言曰適爲項羽相召飲酒欲大醉方近谿濱觀者如堵酒氣猶衝人狀若風狂路人多隨看之又時復以拳入鼻及出拳如故又指谿水令逆流食頃指柳樹令隨谿水來去指橋

令斷復續

續仙傳

馬自然每賒酒于白塔巷酒肆一日沈湎謂主人曰我今得仙矣所逋酒價焉敢輕償遂出囊中藥化賣酒鐵器竝爲紫金卽乘雲而去其橋遂名望仙

勞志

劉商山者中山靖王後舉孝廉歷官合肥令篤好無爲

清簡之道方術服鍊之門五金八石所難致者必力而求之人有方疏未合鍊施效者必給其藥石給其鑪鼎助使成之未嘗有所覬覦也泛蒼雲閒卜居武康上強山下有樵童藥叟雖嘗草木之藥詣門而售者亦答以善價一旦樵夫鬻樵有朮一把亦厚價致之其庭廡之下籬落之閒草木諸藥已堆積矣忽閒步杖策逍遙田畝蹊隧之旁聊自怡適聞叢林閒有人相與言曰中山劉商今日已賜真朮矣蓋陰功篤好之所感乎窺林中杳無人跡奔歸取朮脩而服之月餘齒髮益盛貌如嬰童舉步輕速可及馳馬登涉雲巖無復困憊又月餘坐知四方事驗若符契乃入上強山洞中咸通初有酒家

以樵叟稍異盡禮接之累月復一至因謂酒家曰我中山劉商也夙工水墨願留一圖以酌見待之厚使備緇素而約以再來一日果至酒家援毫運思頃刻而千山萬水非世工之所及將去謂酒家曰我祖淮南王今爲九海總司居列真之任授吾以南溟都水之秩旬日遠別不復來矣如是十許日天色晴霽香風瑞雲彌布山谷樵者見空中騎乘飛舉南去

仙傳拾遺

商彭城人家長安少好學強記精思攻文有胡笳十八拍盛行于世兒童婦女咸悉誦之進士擢第歷臺省爲郎性耽道術逢道士卽師資之鍊丹服氣靡不勤切游茅山久之復往宜興愛罨畫谿之景遂于胡

父渚葺居隱于山中近樵者猶見云吾劉郎中也而

莫知所止已爲地仙矣

續仙傳

劉誼字宜翁湖州人少登進士官至二千石

集仙傳

東林沈氏世爲著姓沈思字持正號東老家頗藏書喜  
賓客東林當錢唐往來之衝士大夫與游客勝士聞其  
好事必過之沈亦應接不倦又能釀十八仙酒一日有  
客布裘青巾自稱回道入長揖于門曰知君白酒新熟  
遠來相訪願一醉實熙寧元年八月十九日也思見其  
風骨秀偉碧眼有光及論古今治亂老莊浮屠理無所  
不通意非塵埃中人也因出酒器數十事于席間曰聞  
道人善飲欲以鼎先爲壽如何道人曰酒器中惟鍾鼎



爲大屈卮螺杯次之而梨花蕉葉最小請戒侍人次第  
速斟當爲公自小至大以飲之笑曰有如顧愷之食蔗  
漸入佳境也又約周如復始滿斟于前笑曰所謂杯中  
酒不空也回公興至卽舉杯而盡乃命東老鼓瑟回浩  
歌和之又嘗圍棋以相娛止弈數子輒拂去笑曰祇恐  
碁中爛斧柯回公自日中至暮已飲數斗無酒色是夜  
月微明秋暑未退而蚊蚋尙多侍人秉扇驅拂偶滅一  
燭回公乃命取竹枝以酒噴之插于壁閒須臾蚊蚋盡  
棲于壁閒而所飲之地灑然思欲有所叩先託以求驅  
蚊之法回公曰且飲小術烏足道哉聞公自能黃白之  
術未嘗妄用且篤于孝義又多陰功此吾所以來訪而

將以發之也東老因叩長生輕舉之術回公曰以四大假合之身未可離形而頓去惟死生去住爲大事死知所往則神生于彼矣東老攝衣起謝有以喻之回公曰此古今人所謂第一最上極則處也此去五年復遇今日公當化去然公之所鍾愛者子偕也治命時不得見之當此之際公亦先期而知謹勿動懷恐喪失公之眞性東老頷而悟之飲將達旦則甕中所釀止留糟粕而無餘漚矣回公曰久不游浙中今日爲公而來當留詩以贈然吾不學世人用筆書乃就擘席上榴皮書字題于庵壁其色微黃而漸加黑詩曰西鄰已富憂不足東老雖貧樂有餘白酒釀來緣好客黃金散盡爲收書凡

三十六字已而告別思啟關送之天漸明矣握手竝行  
笑約異時之集卽揖出門凌石橋而去追躡之已不見  
東老歸購寫照者繪仙人像不甚肖別命圖之正操筆  
忽一道者求齋延入坐坐定東老退具飯少頃竟無所  
見回至畫所第見壁上仙像宛然如所造回仙人無異  
蓋回字者呂字也後四年中秋東老果化去神采如生  
家人舉棺怪其輕視之惟衣履存焉今其地有回仙觀  
陸元老回仙錄東林山志

安吉史長家有道術日游塵市落魄不羈言人灾福往  
往多應窮冬折枝吹之須臾生蓓蕾又吹之則花開時  
方臘之亂郡守使人問之復書云明年三月賊滅後果

然勞志

烏瞻山在長興縣西二十里有烏瞻庵靈應庵宋濠祐中成都楊仲庚隱此山半有禮斗臺伏虎池燒丹井淬劍石及仲庚墓有石像在巖竇中

長興兩烏瞻山一在

北一在西

杜道堅字處逸號南谷子采石人年十四得異書師葛蒙庵爲茅山道士居武康山昇元觀宋皇慶間授隆道沖真崇正真人作覽古樓聚書萬卷

西吳里語

處逸往昇元報德觀興立學建清規百廢具舉徒眾悅服屬元兵南渡所在震動玉石慮燬于崑岡黎庶懼淪于塗炭真人負矢石叩軍門見太傅淮安忠武

王子故鄉披膽陳詞爲民請命王與語大悅恨見之  
晚軍麾爲之劍兵民社因之安堵遂使馳驛入覲帝  
閤詔特委江南搜訪遺逸真人退而上疏言求賢養  
賢用賢之道上嘉納焉

趙孟頫杜道堅碑

姜景良武康人道行高潔能詩有醉蓬萊詞一章

勞志

周德方號廣莫子杜處逸之弟子也性好學所居室扁  
曰不自恕齋坐臥一榻積書數千卷繙閱偶有得則疏  
于別紙歲久成巨帖義理淹貫時出以析疑閒有儒所  
未發性不飲酒日升堂一飯影不出山餘二十年手書  
形離知去同乎大通八字俄側身而逝

黃潛集

金婆者好施茶人來啜茶金婆輒飲其餘瀝數十年不

倦一異人變爲癩者來啜茶金婆亦飲其餘悔而吐之  
異香滿室因得仙道尸解適湖人商于楚過洞庭湖見  
金婆同一道士同舟呼鄉人以隻履寄回

西吳里語

席珍吳興人宋參知政事益之後幅巾野服隱居南山  
下性恬淡學道家有數息法終日危坐寡言笑喜飲酒  
復善鼓琴常留詩酒家壁云山雲出山無一錢日日醉  
倒春風前采蘋橋南徐孺子白酒初熟留神仙山雲其  
自號也晚歲益縱酒行歌道塗嘗謂人曰貧者以酒爲  
衣吾非苦嗜酒特託此以寓其達俗人所不能知也其  
後無疾而逝人以爲仙

研北雜志

沈野雲名道清德清人成祖聞其名召見令致雲物野

雲舉一小瓶噓之雲氣充滿一室厚賜而退初野雲奉命還鄉族親嗤之曰狂道士何處乞勾回也野雲佯不顧但懸一牌子背云賣雷雨時太守方病旱聞之曰得非沈師耶吾昔知北州得其法以救旱不受謝而逸速召之果然乃揖之以禱雨告野雲曰公故人安敢辭然非城隍廟不可太守急延入城隍廟問須何物曰爛猪頭陳煮酒足矣令人奉之大嚼而臥眾道士白太守師正寐安得雨太守令問之曰酒肉未足雨豈遽降太守又具酒肉食畢又臥道士曰時午矣師果何爲野雲曰天午耶請太守觀雨太守盛服至立庭中野雲曰公何不弊衣太守謝不敢乃取四盃至書一雲字于其中擲

之又書雷雨三盃三擲而坐使人視西北方有雲乎曰  
雲矣有頃布滿四空而中天有一穴以筆灑墨擲之倏  
合而雷雨大作須臾水深三尺太守曰可矣雨止太守  
出二十金謝不受但受米分施諸匄者退臥室中諸親  
前嗤之者來誦言神術野雲曰後五日雨當洗壇汝等  
田禾沾足否曰未也翦紙旗與之曰汝插一旗堦上以  
爲別雨必倍之諸親爭受其旗以去五日果大雨而旗  
之所在點雨不集蓋以其前嗤笑故戲之野雲嘗行過  
金陵市中羣兒罵之曰癡道士野雲曰汝皆坐吾有粟  
分與汝曹羣兒信之皆不能起其父母謝之拂袖而起

沈術大抵類此

湖海搜奇



沈野雲字道寧烏程人寓鬱秀道院幼習方外學朝廷累召禱有驗上深悅之賜三品服及湛然純一圖

書

兩浙名賢錄

王禾受法于湖州趙彥能以符咒著奇驗

常熟志

王壽衍字眉叟號谿月有學行居德清至治初徵入京師授宏文輔道粹德真人一時名士若虞楊范揭皆與友善大振玄風時有浙省都事劉時中者名士也既卒貧無以葬壽衍躬至其家弔哭撫其遺孤營其喪事乃爲葬于德清縣與己壽穴相近便於拜掃人皆服其友義

西湖游覽志參德清志

吳興備志卷之十三